

唐尚  
摭書  
故言(一)  
實







尚書故實編綱

李綽編

# 尚書故實

唐 趙郡 李 紹 編

賓護尚書河東張公。三相盛門。四朝雅望。博物自同於壯武。多聞遠邁於聾臣。綽避難圃田。寓居佛廟。秩有同於錐印跡。更甚於酒傭叨。遂迎塵每容侍話。凡聆徵引。必異尋常。足廣後生可貽好事。遂纂集尤異者。兼雜以談諧十數節。作尚書故實云耳。

高祖太武皇帝本名興。文皇帝同上一字。後乃刪去。嘗有碑版鑿處。具在太武是陵廟中玉冊定神堯。乃母后追尊顏公。曾抗疏極論。爲袁參所沮而寢。

太宗酷好法書。有大王真蹟三千六百紙。率以一丈二尺爲一軸。寶惜者獨蘭亭爲最。置於座側。朝夕觀覽。嘗一日附耳語高宗曰。吾千秋萬歲後。與吾蘭亭將去也。及奉諱之日。用玉匣貯之。藏於昭陵。

天冊府弧矢尺度。蓋倍於常者。太宗北逐劉黑闥。爲突厥所窘。遂親發箭射退賊騎。突厥中得此箭。傳觀皆歎伏。神異。後餘弓一張。箭五隻。藏在武庫。歷代一作朝郊丘重禮。必陳於儀衛之前。以耀武德。惜哉。今與法物同爲煨燼矣。然此卽劉氏斬蛇劍之比也。豈不有所歸乎。

司馬天師名承禎。字紫微。形狀類陶隱居。玄宗謂人曰。承禎弘景後身也。天降車上有字曰。賜司馬承禎。尸解去日。白鶴一作雲滿庭。異香郁烈。承禎號白雲先生。故人謂車爲白雲車。至文宗朝。並張騫海槎同取

入內。

有李幼奇者。開元中以藝干柳芳。嘗對芳念百韻詩。芳已暗記。便題之於壁。不差一字。謂幼奇曰。此吾之詩也。幼奇大驚異之。有不平色。久之徐曰。聊相戲。此君所念詩也。因請幼奇更誦所著文章。皆一遍便能寫錄。

又說漢武帝時。嘗有外域獻獨足鶴。人皆不知。以爲怪異。東方朔奏曰。此山海經所謂畢方鳥也。驗之果是。因勑廷臣皆習山海經。山海經伯翳著。劉向編次作序。伯翳亦曰伯益。書曰益典朕虞。蓋隨禹治水撮山海之異。遂成書。郭弘農注解。

鄭廣文作聖善寺報慈閣大像記云。自頂至頤八十三尺。額珠以銀鑄成。虛中盛八石。構聖善寺佛殿僧惠範以罪沒入其財。得一千三百萬貫。

元載破家籍財貨諸物。得胡椒九百石。

盧元公好道。重方士。有王谷者。得黃白術。變瓦礫泥土立成黃金。賓護時在相國大梁幕中。皆目睹之。谷一日死於淮陰。賓護見范陽公敘言。公曰。王十五兄不死。後果有人於湘潭間見之。已變姓名矣。賓護旣徙知廣陵。常亦話於崔魏公。公因說他日有王修能變竹葉爲黃金。某所目擊也。

進士盧融嘗說盧元公鎮南海日。疽發於鬚。氣息惙然。有一少年道士直來牀前。謂相國曰。本師知尚書病瘡。遣某將少膏藥來。可便傳之。相國寵姬韓氏。遂取膏藥疾貼於瘡上。至暮而較數日平復。於倉皇之

際不知道士所來及令勘中門至衙門十數重竝無出入處方知其異也盛膏小銀合子韓氏收得後猶在融卽相國親密目驗其事因附於此

公自言四世祖河東公爲中書令着緋綽安邑宅中·曾有河東·又說傳遊藝居相位着綠。

李師誨者畫蕃馬李漸之孫也爲劉從諫潞州從事知劉不軌遂隱居黎城山潞州平朝廷嘉之就除一縣宰會於衲僧處得落星石一片僧云於蜀路早行見星墜於前遂圍數尺掘之得片石如斷磬其一端有雕刻狻猊之首亦如磬有孔穿條處尙光滑豈天上樂器毀而墜歟此石後流轉到綽安邑宅中

清夜遊西園圖顧長康畫有梁朝諸王跋尾處云圖上若干人並食天廚語出諸子書·檢尋未得貞觀中褚河南裝

背題處具在本張維素家收得維素從申之子傳至相國張公弘時張公鎮并州進圖表

李太尉衛公作也後中貴人崔潭峻自禁中將出復流傳人間維素子周封前涇州從事在京一日有人將此圖求售周封驚異之遽以絹數疋贖得經年忽聞款闕甚急問之見數人同稱仇中尉傳語評事知清夜圖在宅計閑居家貧請以絹三百疋易之周封憚其迫脅遽以圖授使人明日果賣絹至後方知詐僞乃是一力足人求江淮大鹽院時王庶人涯判鹽鐵酷好書畫謂此人曰爲余訪得此圖然遂公所請因爲計取耳及十二家事起復落在一粉鋪內郭侍郎承相國說闔者以錢三百買得獻郭郭公又流傳至令狐家宣宗嘗問相國有何名畫相國具以圖對復進入內

公嘗於貴人家見梁昭明太子腦骨微紅而潤澤抑異於常也

又嘗見人腊長尺許眉目手足悉具或以爲僬僥人也。

又說表弟盧某一日碧空澄澈仰見仙人乘鶴而過別有數鶴飛在前後適覩自一鶴背遷一鶴背亦如人換馬之狀。

國朝李嗣真評事云顧畫屈居第一然虎頭又伏衛協畫北風圖。

毛詩圖義

公平康里宅乃崔司業融舊第有司業題壁處猶在。

蜀王嘗造千面琴散在人間蜀王卽隋文之子楊秀也。

又李汧公取桐孫之精者雜綴爲之謂之百納琴用蝸殼爲徽其間三面尤絕異通謂之響泉韻磬絃一上可十年不斷。

兵部李員外約言汧公之子也識度清曠迥分塵表與主客張員外諱同棄官并韋徵君況墻東遜世不婚娶不治生業李尤厚於張每與張匡牀靜言達旦不寢人莫得知贈張詩曰我有心中事不向韋二說秋夜洛陽城明月照張八諱卽尚書之羣從

佛像本胡夷朴陋人不生敬今之藻繪雕刻自戴顥始也顥嘗刻一像自隱帳中聽人臧否隨而改之如是者積十年厥功方就。

絳州碧落碑文乃高祖子韓王元嘉四男爲先妃所製陳惟玉書今不知者妄有指說非也苟興能書嘗寫狸骨治勞方右軍臨之至今謂之狸骨帖。

古碑皆有圓空音孔蓋碑者悲本也墟墓間物每一墓有四焉初塋穿繩於空以下棺乃古懸窓之禮禮曰公室視豐碑三家視桓楹人因就紀其德由是遂有碑表數十年前有樹德政碑亦設圓空不知根本甚失後有悟之者遂改焉

公自述高伯祖嘉祐開元中爲相州都督解宇有災異郡守物故者連累政將軍吾將軍嘉祐終金至則於正寢整衣冠通夕而坐夜分忽肅屏間聞歎息聲俄有人自西廡而出衣巾藍縷形器憔悴歷階而上直至于前將軍因厲聲問曰是何神祇來至於此答曰余後周將尉遲迴也死於此地遺骸尙存願託有心得畢塋祭前牧守者皆膽薄氣劣驚悸而終非余所害又指一十餘歲女子曰此余之女也同瘞廡下明日將軍召吏發掘果得二骸備衣衾棺器禮而葬之越二夕復出感謝因曰余無他能報效願裨公政節宣水旱唯所命焉將軍遂以事上聞請置廟歲時血食上特降書詔褒異勒碑敍述今相州碑廟見在中書令河東公開元中居相位有張憬藏者能言休咎一日忽詣公以一幅紙大書台字授公公曰余見居台司此何意也後數日貶官台州刺史

河東公鎮并州上問有何事第言之奏曰臣有弟嘉祐遠牧方州手足支離常繫念慮上因口敕張嘉祐可忻州刺史河東屬郡上意不疑張亦不讓豈非至公無隱出於常限者乎

王平南廩右軍之叔也善書畫嘗謂右軍吾諸事不足法惟書畫可法晉明帝師其畫王右軍學其書焉宣平太傅相國盧公應舉時寄居壽州安豐縣別墅嘗遊芍陂芍字今呼爲鵠革下芍藥之芍按魏志是芍音着多見里人負薪者持碧

蓮花一朵已傷器刃矣。云陂中得之。盧公後從事浙西。因使淮服話於太尉衛公。公令搜訪芍陂則無有矣。又偏尋於江渚間。亦終不能得。乃知向者一朵。蓋神異耳。

京國頃歲街陌中有聚觀戲場者。詢之乃二刺蝟對打。令旣合節奏。有中章程。時座中有前將作李少監韞。亦云曾見。

京城佛寺率非真僧。曲檻廻廊。戶牖重複。有一僧室。當門有櫃。局鎖甚牢。竊知者云。自櫃而入。則別有幽房邃閣。詰曲深嚴。囊橐奸回。何所不有。

牛相公僧孺鎮襄州日。以久旱祈禱無應。有處士不記名姓。衆云象龍者。公請致雨。處士曰。江漢間無龍。獨一湫泊中有之。黑龍也。強駁逐。必慮爲災難制。公固命之。果有大雨。漢水泛漲。漂溺萬戶。處士懼罪亦亡去。十年前有人他處見猶在。

汲冢書。蓋魏安釐王家晉時衛郡汲縣耕人於古冢中得之。竹簡漆書科斗文字。雜寫經史。與今本校驗。多有異同。耕人姓不不字呼作彪其名曰準出春秋後序文選中注出

王內史書帖中有與蜀郡守朱不記書求櫻桃來禽。日給藤子。來禽言味甘來衆禽也俗作林檎又云胡桃種已成矣。又問司馬相如楊子雲有後否。蜀城門是司馬錯所製存乎。

盧元公鈞奉道。暇日與賓友話言。必及神仙之事。云某有表弟韋卿材。大和中選授江淮縣宰。赴任出京日。親朋相送。離灤澦。時已曛暮矣。行一二十里外。覺道路漸異。非常日經過處。旣而望中有燈燭熒煌之。

狀林木蔥蒨似非人間頃之有謁于馬前者如州縣候吏問韋曰自何至此此非俗世俄頃復有一人至前謂謁者曰旣至矣則須速報上公韋問曰上公何品秩也吏亦不對卻走而去逡巡遞聲連呼曰上公屈韋下馬趨走入門則峻宇雕牆重廊複閣侍衛嚴肅擬於王侯見一人年僅四十戴平上幘衣素服遙謂韋曰上階韋拜而上命坐慰勞久之亦無肴酒湯果之設徐謂韋曰某因世亂百家相糺竄避於此推某爲長強謂之上公爾來數百年無教令約束但任之自然而已公得至此塵俗之幸也不可久留當宣速去命取綃十疋贈之韋出門上馬卻尋舊路迴望亦無所見矣半夜朧月信馬而行至明則已在官路逆旅暫歇詢之於人且無能知者取綃視之光白可鑒韋遂驟卻入關詣相國具述其事因以委棄分遣親愛相國得綃亦裁制自服韋云約其處乃在驪山藍田之間蓋地仙也

顧況字逋翁文詞之暇兼攻小筆嘗求知新亭監人或詰之謂曰余要寫貌海中山耳仍辟善畫者王默爲副知也

世言牡丹花近有蓋以國朝文士集中無牡丹詩張公嘗言楊子華有畫牡丹處極分明子華北齊人則知牡丹花亦已久矣

又說顧況志尚疎逸近於方外有時宰曾招致將以好官命之況以詩答曰四海如今已太平相公何用喚狂生此身還似籠中鶴東望滄洲叫一聲後吳中皆言況得道解化去

有黃金生者擢進士第人問與頗同房否對曰別洞黃本溪洞豪姓生故以此對人雖哈之亦賞其真實也

王僧虔右軍之孫也。齊高帝嘗問曰：卿書與我書孰優？對曰：臣書人臣第一，陛下書帝王第一。帝不悅。後嘗以楷筆書，恐爲帝所忌，故也。

陸暢字達夫，常爲韋南康作蜀道易。首句曰：蜀道易，易於履平地。南康大喜，贈羅八百疋。南康薨，朝廷欲繩其旣往之事，復閱先所進兵器，刻定秦二字，不相與者，因欲構成罪名。暢上疏理之，云：臣在蜀日見造所進兵器，定秦者，匠之名也。由是得釋。蜀道難，李白罪嚴武也。暢感韋之遇，遂反其詞焉。

聖善寺銀佛，天寶亂爲賊截將一耳。後少傅白公奉佛銀三鋌，添補然不及舊者。會昌拆寺，命中貴人毀像，收銀送內庫中。人以白公所添鑄比舊耳，少銀數十兩，遂詣白公索餘銀，恐涉隱沒故也。

又云：士張林說毀寺時，分遣御史檢天下所齊寺及收錄金銀佛像。有蘇監察者名不記，巡覆兩街諸寺，見銀佛一尺以下者多袖之而歸。謂之蘇杠。烏譜反佛或問溫庭筠：將何對好？遽曰：無以過密陁僧也。

曰：州謝真人上昇前，玉帝錫以鞍馬爲信意者，使其安心也。刺史李堅遺之玉念珠，後問念珠在否，云已在紫皇之前矣。一日真人於紫極宮置齋，金母下降，郡郭處處有虹霓雲氣之狀，至白晝輕舉，萬目睹焉。魏受禪碑、王朗文、梁鵠書、鍾繇鑄字，謂之三絕。鑄字皆須妙於篆籀，故繇方得鑄刻。

張懷瓘書斷曰：篆籀八分，隸書草書章草，飛白行書，通謂之八體。而右軍皆在神品。右軍嘗醉書數字，點畫類龍爪，後遂有龍爪書，如科斗玉筋偃波之類。諸家共五十二般。

公云：舒州灊山下有九井，其實九眼泉也。旱卽煞一大犬投其中，大雨必降。犬亦流出。

又南中久旱，卽以長繩繫虎頭骨，投有龍處，入水，卽數人牽制不定。俄頃雲起潭中，雨亦隨降。龍虎敵也，雖枯骨猶激動如此。

五星惡浮屠像。今人家多圖畫五星雜於佛事中，或謂之禳災者，真不知也。  
武后朝宰相石泉公王方慶瑯琊王也。武后嘗御武成殿閱書畫，問方慶曰：卿家舊法書存乎？方慶遂集自右軍已下至僧虔智永禪師等二十五人，各書一卷進上。后命崔融作序，謂爲寶章集，亦曰王氏世寶也。

今延英殿靈芝殿也。謂之小延英。苗韓公居相位，以足疾步驟微蹇，上每於此待之。宰相對於小延英，自此始也。

臺儀自大夫已下至監察通謂之五院御史。國朝踐歷五院者共三人，爲李商隱張魏公延賞溫僕射造也。

裴岳者，久應舉，與長興于左揆友善。曾有一古鏡子，乃神物也。于相布素時得一照，分曉見有朱衣吏導從他，皆類此賓護。與岳微親，面詰之，云不虛旋，亦墜失。

陳朝謝赫善畫，嘗閱秘閣歎伏。曹不興所畫龍首，以爲若見真龍。

陶貞白所著太清經，一名劍經。凡學道術者，皆須有好劍鏡隨身。又說干將莫耶劍，皆以銅鑄非鐵也。按居古今刀劍錄云：自古好刀劍，多投伊水中以禳勝人之妖。蓋伊水中有怪異似人，膝脛已下至腳，有首鼻口耳手足，常損害人矣。

八分書起於漢時王次仲。次仲有道，詔徵聘於車中化爲大鳥飛去，墜三翮於地。今有大翮山在常山郡界。

兵部李約員外嘗江行，與一商胡舟檝相次。商胡病，固邀相見，以二女託之，皆絕色也。又遺一珠，約悉唯。唯及商胡死，財寶約數萬悉籍其數送官，而以二女求配。始殮商胡時，約自以夜光舍之人莫知也。後死商胡有親屬來理資財，約請官司發掘驗之，夜光果在其密行，皆此類也。

公云：牧弘農日捕獲伐墓盜十餘輩，中有一人請問言事。公因屏吏獨問，對曰：某以他事贖死。盧氏縣南山堯女塚，近亦曾爲人開發，獲一大珠並玉盤，人亦不能計其直。餘寶器極多，世莫之識也。公因遣吏按驗，卽塚果有開處，旋獲其盜。考訊與前通無異，及牽引其徒，稱皆在商州治務中。時商牧名卿也，州移牒公致書，皆怒而不遣。竊知者云：珠玉之器皆入京師貴人家矣。公前歲自京徒步東出過盧氏，復問邑中具如所說。然史傳及地里書並不載此塚，且堯女舜妃也，皆死於湘嶺，今所謂者豈傳說之誤歟？矧貽訓於茅茨土階，不宜有厚葬之事，卽此塚果何人哉。

飛白書始於蔡邕，在鴻門見匠人施墨籌，遂創意焉。梁蕭子雲能之。武帝謂曰：蔡邕飛而不白，義之白而不飛。飛白之間，在斟酌耳。嘗大書蕭字，後人匣而寶之。傳至張氏，賓護東都舊第，有蕭齋，前後序引皆名公之詞也。

杜紫微頃於宰執求小儀不遂，請小秋又不遂。嘗夢人謂曰：辭春不及秋，昆脚與皆頭。後果得比部員外。

又杜公自述·不晉歷  
小比·此必傳之誤·

楊祭酒敬之愛才·公心嘗知江表之士項斯·贈詩曰·處處見詩詩惣好·及觀標格過於詩·平生不解藏人善·到處相逢說項斯·因此名振·遂登高科也·

東都頃千艘造防秋館·穿掘多得蔡邕鴻都學所書石經·後洛中人家往往有之·王內史借船帖·書之尤工者也·故山北盧尚書匡寶惜有年·公致書借之不得·云只可就看·未嘗借人也·公除潞州·旗節在途·纔數程·忽有人將書帖就公求書·閱之乃借船帖也·公驚異問之·云盧家郎君要錢遣賣耳·公歎異·移時不問其價·還之後·不知落於何人·

京師書僧孫盈者·名甚著·盈父曰仲容·亦鑒書畫·精於品目·豪家所寶·多經其手·真僞無逃焉·王公借船帖是孫盈所蓄·人以厚價求之不果·盧公其時急切減而賑之·曰·錢滿百千方得·盧公韓太冲外孫也·故書畫之尤者·多閱而識焉·

嘗有一淪落衣冠·以先人執友方爲邦伯·因遠投謁·冀有厚需·及謁見·卽情極尋常·所賚至寡·歸無道路之費·愁怨動容·因閑步長衢·歎吒不已·忽有一人衣服垢弊·行過于前·迴目之·曰·公有不平之氣·余願知之·因具告情旨·答曰·止於要厚卹小事耳·今夜可宿某舍·至暮往·卽已遲望門外·遂延入·謂之曰·余隱者也·見爲縣獄卒·要在濟人之急·旣夜分·取一椀合于面前·俄頃揭看·見一班白紫綬者·纔長數寸·此人詰責之曰·與人有分·不卹其孤可乎·紫衣者遜謝·久之復用椀覆於地·更揭之則無有矣·明日平旦·聞傳聲

覓某秀才甚急，往則紫衣斂板以待。情義頓濃，遂贈數百縑，亦不言其事。豈非仙術乎？經云佛教上屬鬼宿，蓋神鬼之事，鬼暗則佛教衰矣。吳先生嘗稱有靈鬼錄，佛乃一靈鬼耳。

李抱真之鎮潞州也，軍資匱乏，計無所爲。有老僧大爲郡人信服，抱真因詣之，謂曰：假和尚之道以濟軍中可乎？僧曰：無不可。抱真曰：但言請於鞠場焚身，某當於使宅鑿一地道通連，候火作，卽潛以相出。僧喜從之。遂陳狀聲言，抱真命於鞠場積薪貯油，因爲七日道場，晝夜香燈梵唄雜作。抱真亦引僧入地道，使之不疑。僧仍升座執爐，對衆說法。抱真率監軍僚屬及將吏膜拜其下，以俸入檀施堆于其旁。由是士女駢墳，捨財億計。滿七日，遂送柴積灌油發焰，擊鐘念佛。抱真密已遣人填塞地道，俄頃之際，僧薪竝灰數日，藉所得貨財輦入軍資庫，別求所謂舍利者數十粒，造塔貯焉。

又說洛中頃年有僧得數粒所謂舍利者，貯於琉璃器中，晝夜香燈檀施之利，日無虛焉。有士子迫於寒餒，因請僧願得舍利掌而觀瞻。僧遂出瓶授與，遽卽吞之。僧惶駭如狂，復慮聞之於外。士子曰：與吾幾錢，當服藥出之。僧聞喜，遂贈二百緡。仍取萬病丸與喫。俄頃洩痢，以盆盛貯灌而收之。此一事，東都儲隱說後即江表詩人路豹所爲，豹非苟於利者，乃剛正之性，以懲所爲，豹與張祐崔涯三人，爲文酒之侶也。

章仇兼瓊鎮蜀日，佛寺設大會，百戲在庭。有十歲童兒一作女童舞于竿杪，忽有物狀如雕鶚掠之而去。羣衆大駭，因而罷樂。後數日，其父母見在高塔之上，梯而取之，則神如癡。久之方語，云見如壁畫飛天夜叉者，將入塔中，日飼菓實飲饌之味，亦不知其所自。旬日方精神如初。

晉書中有飲食名寒具者亦無注解處後於齊人要術并食經中檢得是今所謂饅餅桓玄嘗盛具法書名畫請客觀之客有食寒具不濯手而執書畫因有涴玄不憚自是會客不設具

昌黎生者名父子也雖教有義方而性頗闇劣嘗爲集賢校理史傳中有說金根車處皆臆斷之曰豈其誤歟必金銀車悉改根字爲銀字至除拾遺果爲諫院不受俄有以故人子憫之者因辟爲鹿門從事也今謂進士登第爲遷鶯者久矣蓋自伐木詩伐木丁丁鳥鳴嚶嚶出自幽谷遷于喬木又曰嚶其鳴矣求其友聲竝無鶯字頃歲省試早鶯求友詩又鶯出谷詩別書固無證據豈非誤歟

東晉謝太傅墓碑但樹貞石初無文字蓋重難製述之意也


西平王始將禁軍在蜀戍蠻與張魏公不叶及西平功高居相位德宗欲追魏公者數四慮西平不悅而罷後上令韓晉公善說然後竝處中書一日因內宴禁中出瑞錦一疋令繫兩人一處以示和解之意潞州啓聖宮有明皇帝欹枕斜書壁處並腰鼓馬槽竝在公爲潞州從事皆見之

千字文梁周興嗣編次而有王右軍書者人皆不曉其始乃梁武教諸王書令殷鐵石於大王書中揭一千字不重者每字片紙雜碎無序武帝召興嗣謂曰卿有才思爲我韻之興嗣一夕編綴進上鬢髮皆白而賞賜甚厚右軍孫智永禪師自臨八百本散與人間江南諸寺各留一本永往住吳興永福寺積年學書秃筆頭十瓮每瓮皆數石人來覓書並請題頭者如市所居戶限爲之穿穴乃用鐵葉裹之人謂爲鐵門限後取筆頭瘞之號爲退筆塚自製銘誌

孫季雍著葬經。又有著葬略者。言葬用吉禮。僧尼竝不可令見之也。

鄭廣文學書而病無紙。知慈恩寺有柿葉數間屋。遂借僧房居止。日取紅葉學書。歲久殆徧。後自寫所製詩并畫。同爲一卷封進。玄宗御筆書其尾曰。鄭虔三絕。

郭侍郎嘏嘗寶惜書法。一卷每攜隨兵初應舉就雜文試寫畢。夜色猶早。以紙緘裹置於篋中。及納所寶書帖。卻歸鋪於燭籠下。取書帖觀覽。則程試宛在篋中。忽遽驚嗟。計無所出來。往於棘圍門外。見一老吏。詢其事。具以實告。吏曰。某能換之。然某家貧居興道里。倘換得。願以錢三萬見酬。公悅而許之。遂巡賈程試。往而易書帖出授公。公愧謝而退。明日歸親仁里。自以錢送諸興道。款闊久之。吏有家人出。公以姓氏質之。對曰。主父死三日方貧。未辦周身之具。公驚歎久之。方知棘圍所見乃鬼也。遂以錢贈其家而去。余在京曾侍太傅相國盧公宴語。親聞其事。今又得於張公方審其異也云耳。



言摭唐  
(一)

撰保定王

本館叢書集成初編所選裨海及雅雨堂叢書學津討原皆收有此書裨海非足本雅雨本有脫誤處學津本已補正故據學津本排印

# 欽定四庫全書提要

唐摭言十五卷。五代王定保撰。舊本不題其里貫。其序稱王溥爲從翁。則溥之族也。陳振孫書錄解題謂定保爲吳融之壻。光化三年進士喪亂後入湖南。五代史南漢世家稱定保爲邕管巡官。遭亂不得還。劉隱辟置幕府。至劉龜儕號之時尚在其所終則不得而詳矣。考定保登第之歲距朱溫篡唐僅六年。又序中稱溥爲丞相。則是書成於周世宗顯德元年以後。故題唐國號。不復作內詞。然定保生於咸通庚寅。至是年八十五矣。是書蓋其暮年所作也。同時南唐鄉貢士何晦亦有唐摭言十五卷與定保書同名。今晦書未見。而定保書刻於商氏稗海者。刪削大半。殊失其真。此本爲松江宋賓王所錄。末有跋語。稱以汪士鋐本校正。較稗海所載特爲完備。近日揚州新刻。卽從此本錄出。惟是晁公武讀書志稱是書分六十三門。而此本實一百有三門。數目差舛。不應至是。豈商濬之前已先有刪本耶。是書述有唐一代貢舉之制。特詳多史志所未及。其一切雜事。亦足以覘名場之風氣。驗士習之淳澆。法戒兼陳。可爲永鑒。不似他家雜錄。但記異聞已也。據定保自述。蓋間之陸辰、吳融、李渥、顏蕡、王溥、王渙、盧延讓、楊贊圖、崔籍若等所談云。

# 唐摭言目錄

## 卷一

統序科第

會昌五年舉格節文

述進士下篇

兩監

東監

廣文

試雜文

謁先師

貢舉釐革并行鄉飲酒

述進士上篇

散序進士

西監

鄉貢

兩都貢舉

朝見

進士歸禮部

## 卷二

京兆府解送

元和元年登科記京兆等第榜序

廢等第

置等第

府元落

等第罷舉

海述解送

得失以道

恚恨

爭解元叩貢院門求試後到附

等第末爲狀元  
爲等第後久方及第

卷三

散序

期集

過堂

謝恩

點檢文書

關試

今年及第明年登科

慈恩寺題名遊賞賦詠雜記

卷四

節操

師友

與恩地舊交  
氣義

卷五

切磋

以其人不稱才試而後驚

## 卷六

公薦門生薦坐主  
師友相薦附

## 卷七

起自寒苦不第卽貴附

升沈後進

好放孤寒

知己

## 卷八

通榜

陰注陽授

聽響卜

遭遇

王司撓悶夢

自放狀頭

友放

憂中有喜

以賢妻激勸而得者

放老

爲鄉人輕視而得者

已落重收

及第與長行拜官相次

別頭及第

入道

及第後隱居

卷九

防慎不至

好知己惡及第

敕賜及第

惡得及第

四兇

誤掇惡名

好及第惡登科

表薦及第

芳林十哲

卷十

載應不捷聲價益振

海敍不遇

韋莊奏請追贈不及第人近代者

卷十一

反初及第

無官受黜

已得復失

反初不第

薦舉不捷

以德報怨

惡分疎

怨怒附  
憲直

卷十二

自負

輕佻戲謔附  
嘲

設奇沽譽

酒失

卷十三

敏捷

矛盾

惜名

無名子謗議

卷十四

主司稱意

主司失意

卷十五

雜記

條流進士

閩中遇士

賢僕夫

舊語

切忌

沒用處

# 唐摭言卷一

五代 王定保 撰

## 統序科第

周禮鄉大夫具鄉飲酒之教。考其德行。察其道藝。三年舉賢者貢于王庭。非夫鄉舉里選之義。源於中古乎。夫子聖人始以四科齒門弟子。後王因而範之。漢革秦亂。講求典禮。亦解循塗方轍。以須賢俊。考德行。則升孝廉而激浮俗。揜道藝。則第雋造而廣人文。故郡國貢士無虛歲矣。繇是天下上計。集于大司徒府。所以顯五教于萬民者也。我唐沿隋法漢。孜孜矻矻。以事草澤。琴瑟不改。而清濁殊塗。丹漆不施。而豐儉異致。始自武德辛巳歲四月一日。敕諸州學士及早有明經及秀才、俊士、進士。明於理體。爲鄉里所稱者。委本縣考試。州長重覆。取其合格。每年十月隨物入貢。斯我唐貢士之始也。厥有沿革錄之如左。

## 貢舉釐革并行鄉飲酒

開元二十五年二月。敕應諸州貢士。上州歲貢三人。中州二人。下州一人。必有才行。不限其數。所宜貢之。解送之日。行鄉飲禮。牲用少牢。以官物充。

## 會昌五年舉格節文

公卿百寮子弟。及京畿內士人。寄客外州府舉士人等。脩明經進士業者。並隸名所在監及官學。仍精加

考試所送人數。其國子監、明經舊格每年送三百五十人。今請送三百人。進士依舊格送三十人。其隸名明經亦請送二百人。其宗正寺進士送二十人。其東監同華河中所送進士不得過三十人。明經不得過五十人。其鳳翔、山南西道、東道、荆南、鄂岳、湖南、鄭滑、浙西、浙東、廊坊、宣商、涇邠、江南、江西、淮南、西川、東川、陝虢等道所送進士不得過一十五人。明經不得過二十人。其河東、陳許、汴徐泗易定、齊德、魏博、澤潞、幽孟靈夏、淄青、鄆曹、兗海、鎮冀、麟勝等道所送進士不得過七人。明經不得過十人。其諸支郡所送人數請申觀察使爲解都送。不得諸州各自申解。諸州府所試進士雜文據元格並合封送省。准開成三年五月三日敕落下者。今緣自不送所試以來。舉人公然拔解。今諸州府所試各須封送省司檢勘。如病敗不近詞理。州府妄給解者。試官停見任用。闕。

述進士上篇

永徽已前俊秀二科猶與進士並列。咸亨之後凡由文學一舉于有司者競集于進士矣。繇是趙儻等嘗刪去俊秀故目之曰進士登科記。古者閭有序。鄉有庠。以時教行禮而視化焉。其有秀異者則升于諸侯之學。諸侯歲貢其尤著者移之于天子。升于太學。故命曰造士。然後命焉。周禮大樂正論造士之秀者以告于王。而升諸司馬。司馬辨論官材。論進士之賢以告于王者。而定其論。論定然後官之。任官然後爵之。位定然後祿之。若列之于科目。則俊秀盛于漢魏。而進士隋大業中所置也。如侯君素孫伏伽皆隋之進

士也明矣然彰于武德而甲於貞觀蓋文皇帝修文偃武天贊神授嘗私幸端門見新進士綴行而出喜曰天下英雄入吾彀中矣若乃光宅四夷垂祚三百何莫由斯之道者也

### 述進士下篇

元和中中書舍人李肇撰國史補其略曰進士爲時所尚久矣是故俊又實在其中由此而出者終身爲文人故爭名常爲時所弊其都會謂之舉場通稱謂之秀才投刺謂之鄉貢得第謂之前進士互相推敬謂之先輩俱捷謂之同年近年及第未過闈試皆稱新及第進士所以韓中丞儀嘗有知聞近過闈試儀以一篇紀之曰短行納了付三銓休把新銜懶必先今日便稱前進士如留春色與明年有司謂之座主京兆府考而升者謂之等第外府不試而貢者謂之拔解曲江大會在闈試後亦謂之闈宴宴後同年各有所之亦謂之爲離會藉而入選謂之春闈不捷而醉飽謂之打毬耗匿名造謠謂之無名子退而肄業謂之過夏執業以出謂之夏課秋卷亦謂之挾藏入試謂之書策此其大略也其風俗繫於先達其制置存于有司雖然賢者得其大者故位極人臣常有十二三登顯列十有六七而元魯山張睢陽有焉劉闢元脩有焉

### 散序進士

進士科始於隋大業中盛於貞觀永徵之際縉紳雖位極人臣不由進士者終不爲美可至歲貢常不減八九百人其推重謂之白衣公卿又曰一品白衣其艱難謂之三十老明經五十少進士其負倜儻之才

變通之術。蘇、張之辨說。荆、聶之膽氣。仲由之武勇。子房之籌畫。宏羊之書計。方朔之詼諧。咸以是而晦之。脩身慎行。雖處子之不若。其有老死於文場者。亦所無恨。故有詩云。太宗皇帝真長策。賺得英雄盡白頭。獨孤及撰河南府法曹參軍張從師墓誌云。從師祖損之。隋大業中進士甲科。位至侍御史。諸曹員外郎。損之生法。以碩學麗藻。名動京師。亦舉進士。自監察御史爲會稽令。

兩監

按實錄。西監隋制。東監龍朔元年所置。開元已前。進士不由兩監者。深以爲恥。李華員外寄趙七侍御詩。略曰。昔日蕭邵友四人。纔成童華與趙七侍御隣。蕭十功曹顥士。故邵十六司倉軫。未冠遊太學。皆苦貧共弊。五人登科。相次典校。邵後二年擢第。以冤橫貶卒。南中又郭代公崔湜范履冰輩。皆由太學登第。李肇舍人撰國史補。亦云天寶中袁咸用劉長卿分爲朋頭。是時常重兩監。爾後物態澆漓。稔于世祿。以京兆爲榮美。同華爲利市。莫不去實務。華棄本逐末。故天寶二十載敕。天下舉人不得言鄉貢。皆須補國子及郡學生。廣德二年制。京兆府進士。並令補國子生。斯乃救壓覆者耳。奈何人心既去。雖拘之以法。猶不能勝矧或執大政者。不常其人。所立既非自我。則所守亦不堅矣。繇是貞元十年已來。殆絕於兩監矣。貞觀五年已後。太宗數幸國學。遂增築學舍一千二百間。增置學生凡三千二百六十員。無何高麗百濟新羅高昌吐蕃諸國酋長。亦遣子弟請入國學之内。八千餘人。國學之盛。近古未有。至永淳已後。乃廢。龍朔二年九月敕。學生在學。各以長幼爲序。初入學。皆行束脩之禮。各絹三四匹。四門學生各絹二匹。雋士及律書算學州縣學各絹一匹。皆有酒脯。其分束脩三分。

入博士二分助教又每年國子監所管學生國監試州縣學生當州試並藝業優長者爲試官仍長官監試其試者通計一年所授之業口問大義十條得八已上爲上得六已上爲中得五已下爲下類三不及在學九年律生六年不任貢舉者並解退其從縣向州者數下第並須通計服闋重任者不在計限諸博士助教皆分經人並年二十一已下通一經已上未及一經而精神聰悟有文詞史學者每年鈎量舉送所司簡試聽入四門學充俊士卽諸州貢入省試下第情願入學者聽國子監所管學生尙書省補州縣學生州縣長官補州縣學生取郭下縣人代替諸州縣學生習本業之外仍令兼習吉凶禮公私有禮事令示儀式餘皆不得輒使諸百姓立私學其欲寄州縣學授業者亦聽會昌五年正月敕公卿百寮子弟及京畿內士人寄脩明經進士業者並宜隸名太學外州寄學及士人並宜隸名所在官學仍永爲常制

### 西監

元和二年十二月奏兩京諸館學生總六百五十員每館定額如後兩京學生五百五十員國子館八員太學七十四員四門館三百員廣文館六十員律館算館各十員又奏伏見天寶已前國學生其數至多並有員額至永泰後西監置五百五十員東監近置一百員未定每館員額今謹具每館定額如前伏請下禮部准格補置敕旨依

### 東監

東監元和二年十二月敕東都國子監量置學生一百員國子館十員太學十五員四門五十員律館十員廣文館十員書館三員算館二員

### 鄉貢

鄉貢里選盛於中古乎今之所稱蓋本同而末異也今之解送則古之上計也漢武帝置五經博士通古今員數十人  
漢置五經而已奉常太常選民年十八已上好學者補弟子郡國有好文學敬順于鄉黨者令與計偕受業

太常如弟子一歲輒課通經藝補文學掌故上第爲郎其秀異等太常以名聞其下材不事學者罷之若等雖舉於鄉亦由於學兩漢之制蓋本乎周禮者也有唐貞元已前兩監之外亦頗重郡府學生然其時亦由鄉里所升直補監生而已爾後膏粱之族率以學校爲鄙事若鄉貢蓋假名就貢而已景雲之前鄉貢歲二三千人蓋用古之鄉貢也咸亨五年七世伯祖鸞臺鳳閣龍石白水公時任考功員外郎下覆試十一人內張守貞一人鄉貢開耀二年劉思元下五十人內雍思泰一人永淳二年劉廷奇下五十五人內元求仁一人光宅元年閏七月二十四日劉廷奇重試下十六人內康庭芝一人長安四年崔湜下四十一人李溫玉稱蘇州鄉貢景龍元年李欽讓稱定州鄉貢附學爾來鄉貢漸廣率多寄應者故不甄別于榜中信本同而末異也明矣大歷中楊綰疏請復舊章貴全乎實尋亦寢於公族垂空言而已

廣文

天寶九年七月詔於國子監別置廣文館以舉常脩進士業者斯亦救生徒之離散也始其春官氏擢廣文生者名第無高下貞元八年歐陽詹第三人李觀第五人邇來此類不乏暨大中之末咸通乾符以來率以爲末第或曰鄉貢賓也學生主也主宜下於賓故列於後也大順二年孔魯公在相位思矯其弊故特置吳仁璧於蔣肱之上明年公得罪去職及第者復循常而已悲夫

兩都貢舉

永泰元年始置兩都貢舉。禮部侍郎官號皆以知兩都爲名。每歲兩地別放及第。自大歷十一年停東都貢舉。是後不置。

試雜文

進士科與雋秀同源異派。所試皆荅策而已。兩漢之制有射策、對策二義者。何射者謂列策於几案。貢人以矢投之。隨所中而對之也。對則明以策問授其人。而觀其臧否也。如公孫宏、董仲舒皆由此而進者也。有唐自高祖至高宗靡不率由舊章。垂拱元年吳師道等二十七人及第。後敕批云略觀其策並未盡善。若依令式及第者唯祗一人。意欲廣收其材。通三者並許及第。後至調露二年考功員外劉思元奏請加試帖經與雜文。文之高者放八策。尋以則天革命事復因循至神龍元年方行三場試。故常列詩賦題目於榜中矣。

朝見

國朝舊式天下貢士十一月一日赴朝見。長壽二年拾遺劉承之上疏請元日舉人朝見列於方物之前。從之。見狀臺司接覽中使宣口敕慰諭。建中元年十一月朝集使及貢士見於宣政殿。兵興已來四方不上計。內外不會同者二十五年矣。今計吏至一百七十三人矣。仍令朝集使每日二人待制。

謁先師

開元五年九月詔曰古有賓獻之禮登于天府揚于王庭重學尊師興賢進士能美風俗成教化蓋先王之繇焉朕以寡德欽若前政思與子大夫復臻于理故他日訪道有時忘飧乙夜觀書分宵不寐悟專經之義篤學史之文永懷覃思有足尚者不示褒崇孰云獎勸其諸州鄉貢明經進士見訖宜令引就國子監謁先師學官爲之開講質問其義宜令所司優厚設食兩館及監內得舉人亦准其日清資官五品已上及朝集使往觀禮卽爲常式易曰學以聚之間以辯之詩曰如切如磋如琢如磨此朕所望於習才也。

進士歸禮部

雋秀等科比皆考功主之開元二十四年李昂員外性剛急不容物以舉人皆飾名求稱搖蕩主司談毀失實竊病之而將革焉集貢士與之約曰文之美惡悉知之矣考核取舍存乎至公如有請託於時求聲於人者當首落之旣而昂外舅常與進士李權鄰居相善乃舉權於昂昂怒集貢人召權庭數之權謝曰人或猥知竊聞於左右非敢求也昂因曰觀衆君子之文信美矣然古人云瑜不掩瑕忠也其有詞或不典將與衆評之若何皆曰唯公之命旣出權謂衆曰向之言其意屬吾也吾誠不第決矣又何藉焉乃陰求昂瑕以待之異日會論昂果斥權章句之疵以辱之權拱而前曰夫禮尚往來來而不往非禮也鄙文不臧旣得而聞矣而執事昔有雅什常聞於道路愚將切磋可乎昂怒而嘻笑曰有何不可權曰耳臨清渭洗心向白雲間豈執事之詞乎昂曰然權曰昔唐堯衰耄厭倦天下將禪於許由由惡聞故洗耳今天子春秋鼎盛不揖讓於足下而洗耳何哉是時國家寧謐百寮畏法令兢兢然莫敢跌昂聞惶駭蹶起不

知所酬，乃訴於執政。謂權風狂不遜，遂下權吏初昂強復不受囑請。及有請求者，莫不先從。由是庭議以省郎位輕，不足以臨多士。乃詔禮部侍郎專之矣。

論曰：永徽之後，以文儒亨達不由兩監者稀矣。于時場籍先兩監而後鄉貢，蓋以朋友之臧否，文藝之優劣，切磋琢磨，匪朝伊夕。抑揚去就，與衆共之。有如趙邵、蕭李、趙驛、邵軫、蕭穎士、李華、婁師德、郭元振、靡不名遂功成，交全契分。洎乎近代，厥道寢微。玉石不分，薰蕕錯雜。長我之望，殊歟。遠方之來，亦乖止。謂羣居固非瓦合，是知生而知之者性也。學而知之者習也。渾金璞玉，又何追琢之勞乎？潢汙行潦，又何板築之置乎？紵衣之獻，彼跡疎而道親也。畫龍之刻，斯面交而心賊也。後之進者，定交擇友，當問道之何如。



# 唐摭言卷二

## 京兆府解送

神州解送。自開元天寶之際。率以在上十人。謂之等第。必求名實相副。以滋教化之源。小宗伯倚而選之。或至渾化。不然。十得其七八。苟異於是。則往往牒貢院請落。由暨咸通乾符。則爲形勢吞嚼。臨制近同。及第得之者。互相誇詫。車服侈靡。不以爲僭。仍期集人事。貞實之士。不復齒。所以廢置不定職。此之由。其始末錄之如左。

## 元和元年登科記京兆等第榜敍

天府之盛。神州之雄。選才以百數爲名。等列以十人爲首。起自開元天寶之世。大歷建中之年。得之者搏躍雲衢。階梯蘭省。卽六月沖霄之漸也。今所傳者。始于元和景戌歲。次敍名氏。目曰神州等第錄。

## 廢等第

開成二年。大尹崔珙判云。選文求士。自有主司。州司送名。豈合差第。今年不定高下。不鎖試官。旣絕猜嫌。暫息浮競。差功曹盧宗回主試。除文書不堪送外。便以所下文狀爲先後。試雜文後。重差司錄侯雲章充試官。竟不列等第。明年崔珙出鎮徐方。復置等第。

大中七年。韋澳爲京兆尹。榜曰。朝廷將裨教化。廣設科場。當開元天寶之間。始專明經進士。及貞元元和

之際又益以薦送相高當時唯務切磋不分黨甲絕僥倖請託之路有推賢讓能之風等列標名僅同科第既爲盛事固可公行近日已來前規頓改互爭強弱多務奔馳定高卑於下第之初決可否於差肩之日曾非考覈盡繫經營與學雄文例舍於貞方寒素增年矯貌盡取於朋比羣強雖中選者曾不足云而爭名者益熾其事澳叨居畿甸合貢英髦非無藻鑑之心懼有愛憎之謗且李膺以不察孝廉去任胡廣以輕舉茂才免官況在管窺實難裁處况禮部格文本無等第府解不合區分其今年所合送省進士明經等並以納策試前後爲定不在更分等第之限

置等第

乾符四年崔湧爲京兆尹復置等第差萬年縣尉公乘億爲試官試火中寒暑退賦殘月如新月詩。

李時文公孫·韋硎沈駕羅隱劉綦倪曙

唐駢池人周繁善賦吳廷隱賈涉其年所試八韻涉擅場而屈其等第

府元落

郭求元和元年·楊正舉六唐炎八年·高鉞九平曾長慶二年貶

崔伸寶歷二年罷·韋鋌太和二年鄭從讜開成二年韋瑑乾寧二年

等第末爲狀元

李固言元和七年

等第罷舉

劉鷺。

田鬯。

七年並元和

張僕。

章元佐。

八年並元和

孟夷。

年十二

韋璟。

十四並長慶

辛諒。

崔慤。

薛渾。

元年並長慶

韋漸。

李餘。

年並二

郭崖。

年三

李景方。

盧鑑。

元年並寶歷

韋敖。

年並二年

元道。

韋衍。

並大和二年

樊京。

卒並

劉筠。

年並八年

崔漬。

開成二年

胡澳。

溫岐。

四年並

蘇俊。

年並三

韓肱。

年並三

孫璵。

年昌二

李蕃。

年並四

沈駕。

年並三

魏鐸。

年並三

周繁。

並乾符三年

黃頗。

劉綦。

後二十一年

爲等第後久方及第

韋力仁。

趙蕃。

並三年

黃頗。

劉綦。

後二十一年

論曰孟軻言遇不遇命也或曰性能則命通以此循彼匪命從於性耶若乃大者科級小者等列當其角逐文場星馳解試品第潛方於十哲春闈斷在於一鳴奈何取舍之源殆不踵此或解元永黜或高等尋休黃頤以洪奧文章蹉跎者一十三載劉綦以平漫子弟汨沒者二十一年溫岐濫竄於白衣羅隱負冤

於丹桂。由斯言之。可謂命通性能。豈曰性能命通者歟。苟拂於是。何姦宄亂常不有之矣。京兆府解試比同之後並只就一場耳。

海述解送

荆南解比號天荒。大中四年。劉蛻舍人以是府解及第。時崔魏公作鎮。以破天荒錢七十萬資蛻。蛻謝書略曰。五十年來。自是人廢。一千里外。豈曰天荒。

爭解元

叩貢院門求試後到附

同華解最推利市。與京兆無異。若首送。無不捷者。元和中。令狐文公鎮三峯時。及秋賦榜云。特加置五場。蓋詩謌文賦帖經爲五場。常年以清要書題求薦者。率不減十數人。其年莫有至者。雖不遠千里而來。聞是皆寢去。唯盧宏正尙書獨詣華請試。公命供帳酒饌。侈靡於往時。華之寄客。畢縱觀於側。宏正自謂獨步文場。公命日試一場。務精不務敏也。宏正已試兩場。而馬植下解。植將家子弟。從事輩皆竊笑。公曰。此未可知。旣而試登山采珠賦。略曰。文豹且異於驪龍。採斯疎矣。白石又殊於老蚌。剖莫得之。公大伏其精當。遂奪宏正解元。後宏正自丞郎將判鹹。俄而爲植所據。宏正以手札戲植曰。昔日華元已遭毒手。今來鹹務。又中老拳。復日試破竹賦。咸通末。永樂崔侍中廉問江西。取羅鄴爲督郵。鄴因主解試時。尹璞自遠來求計。偕璞有文而使氣。鄴挾私黜之。璞大恚怒。疏鄴云。羅鄴諱則。則可知也。鄴父則。爲餘杭鹽鐵小吏。白樂天典杭州。江東進士多奔杭取解。時張祐自負詩名。以首冠爲已任。旣而徐凝後至。會郡中有宴樂。

天諷二子矛楯祐曰僕爲解元宜矣凝曰君有何嘉句祐曰甘露寺詩有日月光先到山河勢盡來又金山寺詩有樹影中流見鐘聲兩岸聞凝曰善則善矣奈無野人句云千古長如白練飛一條界破青山色祐愕然不對於是一座盡傾凝奪之矣

大中中紇于峻與魏鏗爭府元而紇于屈居其下翌日鏗暴卒時峻父方鎮南海由是爲無名子所謗曰離南海之日應得數斤當北闕之前未消一捻因此峻兄弟皆罷舉張又新時號張三頭進士狀頭·宏詞敕頭·京兆解頭國朝自廣明庚子之亂甲辰天下大荒車駕再幸岐梁道殣相望郡國率不以貢士爲意江西鍾傳令公起於義聚奄有疆土充庭述職爲諸侯表式而乃孜孜以薦賢爲急務雖州里白丁片文隻字求貢于有司者莫不盡禮接之至於考試之辰設會供帳甲於治平行鄉飲之禮常率賓佐臨視拳拳然有喜色復大會以餞之筐篚之外率皆資以桂玉解元三十萬解副二十萬海送皆不減十萬垂三十載此志未嘗稍怠時舉子有以公卿關節不遠千里而求首薦者歲常不下數輩

合淝李郎中羣始與楊衡符載等同隱廬山號山中四友記姓名·內一人不先是封川李相遷閻長會有名郎出牧九江郡者執辭之際屢以文柄迎賀於公公曰誠如所言廬山處士四人儻能計偕當以到京兆先後爲齒旣公果主文於是擁旌旗造柴關激之而笑時三賢皆膠固唯合淝公年十八瞿然曰及其成功一也遂束書就貢比及京師已鎖貢院乃搥院門請引見公問其所止荅云到京後時未遑就館合淝神質瓊秀主副爲之動容因曰不爲作狀頭便可延於吾廬矣楊衡後因中表盜衡文章及第詣闕尋其人遂

舉亦及第。或曰：見衡業古調詩，其自負者有一「鶴聲飛上天」之句。初遇其人，頗憤怒。既而問曰：「且一一鶴聲飛上天，在否？」前人曰：「此句知兄最惜，不敢輒偷衡笑。」曰：「猶可恕矣。」符載後佐李駢爲江西副使，失意去從劉闢。已上李羣與楊衡、符載等事一節。

高貞公郢就府解後時，試官別出題目曰：「沙洲獨鳥賦。」郢援筆而成曰：「鵠有飛鳥在河之洲，一飲一啄。」其年首送。

得失以道

李翹與弟正辭書。

貞元末，正辭取京兆解，據不送，翹故以書勉之。

其書曰：「知汝京兆府取解，不得如其所懷，念勿在意。凡人之窮

達所遇，猶各有時。爾何獨至於賢丈夫而反無其時哉？此非吾人之所憂也。吾所憂者，何畏吾之道未到於天人之際耳。其心既自以爲到，且無謬，則吾何往而不得所樂？何必與夫時俗之人同得失？憂喜而動乎心，借如用汝之所知，分爲十焉，用其九學聖人之道，而和其心，使餘者以與時進退俯仰，如可求也。則不啻富且貴也。如非吾力也，雖盡其十，祇益動其心爾，安能有所得乎？汝勿信人號文章爲一藝，夫所謂一藝者，乃時俗所好之文，或有盛名於近代者是也。其能到古人者，則仁義之辭也。惡得一藝而名之哉？仲尼孟軻沒千餘歲矣，吾不及見其人，能知其聖且賢者，以吾讀其辭而得之者也。後來者不可期，安知其讀吾辭者，而不知吾心之所存乎？亦未可誣也。夫性於仁義者，未見其無文也。有文而能到者，則吾未見其不力於仁義也。由仁義而後文者，性也。由文而後義者，習也。猶誠明之必相依爾。貴與富在乎外者

也吾不能知其無也非吾求而能至者也吾何愛屑屑於其間哉仁義與文章生乎內者也吾知其有也吾能求而充之者也吾何懼而不爲哉汝雖性過於人然而未能浩浩於其心吾故書其所懷以張汝且以樂言吾道云爾

恚恨

太和初李相回任京兆府參軍主試不送魏相公蕃深銜之會昌中回爲刑部侍郎蕃爲御史中丞嘗與次對官三數人候對於閣門蕃曰某頃歲府解蒙明公不送何幸今日同集于此回應聲答曰經呼如

今也不送蕃爲之色變益懷憤恚後回謫牧建州蕃大拜回有啓狀蕃悉不納既而回怒一衙官決杖勒停建州衙官能庇徭役求隸籍者所費不下數十萬其人切恨停廢後因亡命至京師接時相訴冤諸相皆不問會停午憩于槐陰顏色憔悴傍人察其私詰之其人具述本意於是誨之曰建陽相公素與中書相公有隙子盍詣之言訖魏公導騎自中書而下其人常懷文狀卽如所誨望塵而拜導從問對曰建州百姓訴冤公聞之倒持麈尾敲檐子門令止及覽狀所論事二十餘件第一件取同姓子女入宅於是爲魏相極力鍛成大獄時李相已量移鄧州刺史行次九江遇御史鞠却廻建陽竟坐貶撫州司馬終於貶所

盧吉州肇開成中就江西解試爲試官不送肇有啓謝曰巨鼇負最首冠蓬山試官謂之曰昨某限以人數擠排雖獲申展深慙名第奉浼焉得翻有首冠蓬山之謂肇曰必知明公垂問大凡頑石處士巨鼇戴

之豈非首冠耶。一座聞之大笑。

華良夫嘗爲京兆解不送。良夫以書讓試官曰：聖唐有天下垂二百年，登進士科者三千餘人。良夫之族，未有登是科者。以此慨歎憤惋，從十歲讀書學爲文章，手寫之文過於千卷。

王泠然與御史高昌宇書曰：僕之怪君甚久矣。不憶往日任宋城縣尉乎？僕稍善文章，每蒙提獎，勤勤見過，又以齊咷叨承恩顧，銘心在骨。復聞升進不出臺省，當爲風波可望，故舊不遺，近者伏承皇皇者，華出使江外，路次于宋，依然舊遊，門生故人，動有十輩，蒙問及者衆矣。未嘗言泠然明公縱欲高心，不垂半面，豈不畏天下窺公侯之淺深，與著綠袍乘驄馬，踰踰正色，誰敢直言？僕所以數日伺君望塵而拜，有不平事，欲圖於君，莫厭多言，而彰公短也。先年中僕雖幼小，未閑聲律，輒參舉選，公旣明試，量擬點額，僕之枉落，豈肯緘口？是則公之激僕，僕豈不知公之辱僕？僕終不忘其故，亦上一紙書，蒙數徧讀，重相摩獎，道有性靈云：某年來掌試，仰取一名，於是遂巡受命，匍匐而歸，一年在長安，一年在洛下，一年在家園，去年冬十月得送，今年春三月及第，往者雖蒙公不送，今日亦自致青雲，天下進士有數，自河以北，唯僕而已。光華藉甚，不是不知。君須稍垂後恩，雪僕前恥，若不然，僕之方寸，別有所施，何者？故舊相逢，今日之謂也。僕之困窮，如君之往昔，君之未遇，似僕之今朝，因斯而言，相去何遠？君是御史，僕是詞人，雖貴賤之間，與君隔闊，而文章之道，亦謂同聲，而不可以富貴驕人，亦不可以禮義見隔。且僕家貧，親老，常少供養，兄弟未有官資，嗷嗷環堵，菜色相看，貧而賣漿，值天涼，今冬又屬停選試，遣僕爲御史，君在貧途，見天下文章。

精神氣調得如王子者哉。實能憂其危，拯其弊。今公之富貴亦不可多得意者。望御史今年爲僕索一婦。明年爲留心一官。幸有餘力。何惜些些。此僕之宿憾。口中不言。君之此恩。頂上相戴。儻也貴人多忘。國士難期。使僕一朝出其不意。與君並肩臺閣。側眼相視。公始悔而謝僕。僕安能有色於君乎。僕生長草野。語誠觸忤。并詩若干首。別來三日。莫作舊眼相看。山東布衣。不識忌諱。冷然頓首。論曰。子曰。不怨天。不尤人。下學而上達。又曰。求己不責於人。君子振跡發身。咸覬善地。反之於己。何得喪之不常。望之於人。則愛憎之競作。王洽然之負氣。推命何疎。魏丞相之復仇。尤人太過。陵轢險詖。二子得之。有若李文公誨弟之書。華良夫于時之啓。所謂君子之儒也。徐凝馬植。豈非得之。且武當垂名於不朽。尹璞所謂雖文何益。後之學者。不得不以爲炯戒哉。



# 唐摭言卷二

## 散序

定保生於咸通庚寅歲時屬南蠻騷動諸道徵兵自是聯翩寇亂中土雖舊第太平里而跡未嘗達京師故治平盛事罕得博聞然以樂聞科第之美嘗諮詢於前達間如丞相吳郡公辰翰林侍郎濮陽公融恩門右省李常侍渥顏夕拜葬從翁丞相溥從叔南海記室煥其次同年盧十三延讓楊五十一贊圖崔二十七籍若等十許人時蒙言及京華故事靡不錄之於心退則編之於簡策始以進士宴遊之盛案李肇舍人國史補云曲江大會比爲下第舉人其筵席簡率器皿皆隔山拋之屬比之席地幕天殆不相遠爾來漸加侈靡皆爲上列所據向之下第舉人不復預矣所以長安遊手之民自相鳩集目之爲進士團初則至寡洎大中咸通已來人數頗衆其有何士參者爲之酋帥尤善主張筵席凡今年纔過關宴士參已備來年遊宴之費繇是四海之內水陸之珍靡不畢備時號長安三絕南院主事鄭容中書門下張良佐并士參爲三絕團司先於主司宅側稅一百餘輩各有所主大凡謝後便往期集院團司先於主司宅側稅一院內供帳宴饌卑於輦轂其日狀元與同年相見後便請一人爲錄事舊例率以狀元爲錄事其餘主宴主酒主樂探花主茶之類咸以其日辟之主樂兩人一人主飲妓放榜後大科頭兩人第一平時不以數後部常詰旦至期集院常宴則小科頭主張大宴則大科頭縱無宴席科頭亦逐日請給茶錢每人日五百文

第一部樂官科地每日一千第二部五百見燭皆倍科頭皆重分逼

曲江大會則先牒教坊請奏上御紫雲樓垂簾觀焉時或擬作樂則爲之移日故曹松詩云追遊若遇三清樂行從應妨一日春敕下後人置被袋例以圖障酒器錢絹實其中逢花卽飲故張籍詩云無人不借花園宿到處皆攜酒器行其被袋狀元錄事同檢點闕一則罰金曲江之宴行市羅列長安幾於半空公卿家率以其日揀選東牀車馬闌塞莫可殫述洎巢寇之亂不復舊態矣

謝恩

狀元已下到主司宅門下馬緩行而立斂名紙通呈入門並敍立於階下北上東向主司列席褥東面西向主事揖狀元已下與主司對拜拜訖狀元出行致詞又退著行各拜主司答拜拜訖主事云請諸郎君敍中外狀元已下各各齒敍便謝恩餘人如狀元禮禮訖主事云請狀元曲謝名第第幾人謝衣鉢謂得衣鉢主司名第其或與主司先人同名第卽謝衣鉢如踐世科卽感泣而謝謝訖卽登階狀元與主司對坐于時公卿來看皆南行敍坐飲酒數巡便起赴期集院致謝公卿來看或不坐而去三日後又曲謝其日主司方一一言及薦導之處俾其各謝挈維之力苟特達而取亦要言之

期集

謝恩後方詣期集院大凡敕下已前每日期集兩度詣主司之門然三日後主司堅請已卽止同年初到集所團司所由輩參狀元後便參衆郎君拜訖俄有一吏當中庭唱曰諸郎君就坐隻東雙西其日釀罰不少又出抽名紙錢每人十千文其斂名紙見狀元俄於衆中募抽三五箇便出此錢鋪底一自狀元已

下每人三十千文。

點檢文書

狀元錄事具啟事取人數主司於其間點請三五人工於八韻五言者或文字乖訛便在點竄矣大約避廟諱御名宰相諱然三十所製分爲兩卷以金銅軸頭青縹首進上

過堂

其日團司先於光範門裏東廊供帳備酒食同年於此候宰相上堂後參見于時主司亦召知聞三兩人會於他處此筵罰錢不少宰相旣集堂吏來請名紙生徒隨座主過中書宰相橫行在都堂門裏敍立堂吏通云禮部某姓侍郎領新及第進士見相公俄有一吏抗聲屈主司乃登階長揖而退立於門側東向然後狀元已下敍立於階上狀元出行致詞云今月日禮部放榜某等幸忝成名獲在相公陶鑄之下不任感懼在左右下卽言訖退揖乃自狀元已下一一自稱姓名稱訖堂吏云無客主司復長揖領生徒退詣舍人院主司欄簡舍人公服靸鞋延接主司然舍人禮貌謹敬有加隨事敍杯酒列於階前鋪席褥請舍人登席諸生皆拜舍人答拜狀元出行致詞又拜答拜如初便出於廊下候主司出一揖而已當時詣宅謝恩便致飲席

關試

吏部員外其日於南省試判兩節諸生謝恩其日稱門生謂之一日門生自此方屬吏部矣

讞名

大相識

主司在  
具慶

次相識

主司在  
偏侍

小識相

主司有  
兄弟

聞喜

敕士

櫻桃

月燈

打毬

牡丹

看佛牙

每人人二

佛牙樓

寶壽

定水

莊殿皆有之

寶壽量成佛牙

用精函子盛

銀菩薩捧之

然得一僧跪捧菩薩

多是僧錄或首座

方得捧之矣

關醜筵

備述於前矣

此最大宴亦謂之離

今年及第明年登科

郭代云十八擢第其年冬制入高等

何扶太和九年及第明年捷三篇因以一絕寄舊同年曰金榜題名墨上新今年依舊去年春花間每被紅粧問何事重來只一人

慈恩寺題名遊賞賦詠雜紀

進士題名自神龍之後過關宴後率皆期集於慈恩塔下題名故貞元中劉太真侍郎試慈恩寺望杏園花發詩會昌三年贊皇公爲上相其年十一月十九日敕諫議大夫陳商守本官權知貢舉後因奏對不稱旨十二月十七日宰臣遂奏依前命左僕射兼太常卿王起主文二十二日中書覆奏奉宣旨不欲令及第進士呼有司爲座主趨附其門兼題名局席等條疏進來者伏以國家設文學之科求貞正之士所宜行敦風俗義本君親然後申於朝廷必爲國器豈可懷賞拔之私惠忘教化之根源自謂門生遂成膠固所以時風寢薄臣節何施樹黨背公靡不由此臣等商量今日已後進士及第任一度參見有司向後不得聚集參謁及於有司宅置宴其曲江大會朝官及題名局席並望勒停緣初獲美名實皆少雋既遇

春節難阻良遊。三五人自爲宴樂。並無所禁。唯不得聚集同年進士。廣爲宴會。仍委御史臺察訪聞奏。謹具如前奉敕。宜依於是向之題名。各盡削去。蓋贊皇公不由科第。故設法以排之。洎公失意。悉復舊態。曲江遊賞。雖云自神龍以來。然盛於開元之末。何以知之。案實錄天寶元年。敕以太子太師蕭嵩私廟逼近曲江。因上表請移他處。敕令將士爲嵩營造。嵩上表謝。仍議令將士創造。敕批云。卿立廟之時。此地閑僻。今傍江脩築。舉國勝遊。與卿思之。深避喧雜。事資改作。遂命官司承已拆除。終須結構。已有處分。無假致辭。

蕭穎士開元二十三年及第。恃才傲物。夐無與比。常自攜一壺逐勝郊野。偶憩於逆旅。獨酌獨吟。會風雨暴至。有紫衣老父。領一小僮避雨於此。穎士見其散冗頗肆陵侮。逡巡風定雨霽。車馬卒至。老父上馬。呵殿而去。穎士倉忙覘之。左右曰。吏部王尚書也。穎士常造門。未之面。極所驚愕。明日具長牋造門謝。尚書命引至廡下。坐而責之。且曰。所恨與子非親屬。當庭訓之耳。復曰。子負文學之名。倨忽如此。止於一第乎。穎士終于揚州功曹。小歸。尚書榜裴起部。與邠之李搏。先輩舊友。搏以詩賀。廷裕曰。銅梁千里曙雲開。仙筭新從紫府來。天下也張新羽翼。世間無復舊塵埃。嘉祐果中君平卜。賀喜須斟卓氏盃。應笑戎藩刀筆吏。至今泥滓曝魚鰓。既而復以二十八字謔之曰。曾隨風水化。凡鱗安上門。前一字新聞。道蜀江風景好。不知何似杏園春。裴有六韻答曰。何勞問我成都事。亦報君知便納降。蜀柳籠堤煙蠹蠹。海棠當戶鬱雙雙。富春不並窮師子。濯錦全勝旱曲江。高卷絳紗楊氏宅。時主文寓楊子巷。故有此句。半垂紅袖薛濤窗。浣花泛鷁詩千

首靜衆尋梅酒百缸。若說絃歌與風景。主人兼是碧油幢。

大和二年崔郾侍郎東都放榜。西都過堂。杜牧有詩曰。東都放榜未花開。三十三人走馬迴。秦地少年多釀酒。却將春色入關來。

胡証尚書質狀魁偉。膂力絕人。與裴晉公度同年度。嘗狎遊爲兩軍力人十許輩。陵轢勢甚危窘。度潛遣一介求救於証。証衣皁貂金帶。突門而入。諸力士睨之失色。証飲後到酒。一舉三鍾。不啻數升。杯盤無餘瀝。逡巡主人上燈。証起取鐵燈臺。摘去枝葉。而合其跗。橫置膝上。謂衆人曰。鄙夫請非次改令。凡三鍾引滿一遍。三臺酒須盡。仍不得有滴瀝。犯令者一鐵躋。自謂燈臺。証復舉三鍾。次及一角瓶者。凡三臺三徧。酒未能盡。淋漓逮至並座。証舉躋將擊之。羣惡皆起設拜叩頭乞命。呼爲神人。証曰。鼠輩敢爾。乞汝殘命。叱之令去。

崔沆及第年爲主罰錄事。同年盧象俯近關宴。堅請假往洛下拜慶。旣而淹緩久之。及同年宴於曲江亭。子象以雕轡載妓。微服輞鞚。縱觀於側。遽爲團司所發。沆判之略曰。深攬席帽。密映氳車。紫陌尋春。便隔同年之面。青雲得路。可知異日之心。

咸通中進士及第過堂後。便以驃從車服侈靡之極。稍不中式。則重加罰金。蔣泳以故相之子。少年擢第。時家君任太常卿。語泳曰。爾門緒孤微。不宜從世祿所爲。先納罰錢。慎勿以驃從也。

盧文煥光化二年狀元及第。頗以宴醵爲急務。常俯關宴。同年皆患貧。無以致之一。一旦給以遊齊國公亭。

子既至皆解帶從容文煥命團司牽驢時柳璨告文煥以驢從非已有文煥曰藥不瞑眩厥疾弗瘳璨甚

銜之居四年璨登庸文煥憂戚日加璨每遇之曰藥不瞑眩厥疾弗瘳

曲江亭子安史未亂前諸司皆列於岸濱幸蜀之後皆燼於兵火矣所存者唯尚書省亭子而已進士關宴常寄其間旣徹饌則移樂泛舟率爲常例宴前數日行市駢闐於江頭其日公卿家傾城縱觀於此有若中東床之選者十八九鉢車珠鞍櫈比而至或曰乾符中薛能尚書爲大京兆楊知至侍郎將攜家人遊致書於能假舫子先是舫子已爲新人所假能答書云已爲三十子之鳩居矣知至得書怒曰昨日郎吏敢此無禮能自吏部郎中拜京兆少尹權知大尹開成五年樂和李公榜於時上在諒闈故新人遊賞率常稚飲詩人趙嘏寄贈日天上高高月桂叢分明三十一枝風滿懷春色向人動遮路亂花迎馬紅鶴馭迴飈雲雨外蘭亭不在管絃中居然自是前賢事何必青樓倚翠空

寶歷年中楊嗣復相公具慶下繼放兩榜時先僕射自東洛入覲嗣復率生徒迎於潼關旣而大宴於新昌里第僕射與所執坐於正寢公領諸生翼坐於兩序時元白俱在皆賦詩於席上唯刑部楊汝士侍郎詩後成元白覽之失色詩曰隔坐應須賜御屏盡將仙翰入高冥文章舊價留鸞掖桃李新陰在鯉庭再歲生徒陳賀宴一時良史盡傳馨當年疏傅雖云盛詎有茲筵醉醻醰汝士其日大醉歸謂子弟曰我今日壓倒元白

大順中王渙自左史拜考功員外同年李德鄰自右史拜小戎趙光允自補袞拜小儀王拯自小版拜少

勳渙首唱長句感恩。上裴公曰：青衿七十榜三年，建禮含香次第遷。珠彩乍連星錯落，桂花曾到月嬋娟。玉經磨琢多成器，劍拔沈埋便倚天。應念銜恩最深者，春來爲壽拜尊前。裴公答曰：謬持文柄得時賢。粉署清華次第遷。昔歲策名皆健筆，今朝稱職並同年。各懷器業寧推讓，俱上青霄豈後先。何事老來猶賦詠，欲將酬和永留傳。王起於會昌中放第二榜，內道場詩僧廣宣以詩寄賀曰：從辭鳳閣掌絲綸，便向青雲領貢賓。再闢文場無枉路，兩開金榜絕冤人。眼看龍化門前水，手放鶯飛谷口春。明日定歸台席去，鵠鵠原上共陶鈞。起答曰：延英面奉入青闈，亦選功夫亦選奇。在治只求金不耗，用心空學稱無私。龍門變化人皆望，鶯谷飛鳴自有时。獨喜向公誰是證，彌天上士與新詩。

周墀任華州刺史。武宗會昌三年，王起僕射再主文柄。墀以詩寄賀，并序曰：僕射十一叔，以文學德行當代推高，在長慶之間，春闈主貢，采摭孤進，至今稱之。近者朝廷以文柄重難，將抑浮華，詳明典實，繇是復委前務。三領貢籍，迄今二十二年于茲，亦縉紳儒林罕有如此之盛況。新榜既至，衆口稱公。墀忝沐深恩，喜陪諸彥，因成七言四韻詩一首，輒敢寄獻，用導下情，兼呈新及第進士。文場三化魯儒生，二十餘年振重名。曾忝木鷄誇羽翼，又陪金馬入蓬瀛。墀初年木鷄賦及第，常陪僕射守職內庭。雖欣月桂居先折，更羨春蘭最後榮。欲到龍門看風水，關防不許暫離營。時諸進士皆賀，起答曰：貢院離來二十霜，誰知更忝主文場。楊葉縱能穿舊的，桂枝何必愛新香。九重每憶同仙禁，六義初吟得夜光。莫道相知不相見，蓮峯之下欲徵黃。

王起門生一榜二十二人，和周墀詩。嵩高降德爲時生，洪筆三題造化名。鳳詔佇歸專北極，驪珠搜得盡。

三轄春闌冠古今。蘭署門生皆入室。蓮峯太守別知音。同升翰苑時名重。遍歷朝端主意深。新有受恩江海客。坐聽朝夕繼爲霖。丁穉字子威。三年竭力向春闌。塞斷浮華衆路岐。盛選棟梁稱昔日。平均雨露及明時。登龍舊美無斜徑。折桂新榮盡直枝。莫道只陪金馬貴。相期更在鳳凰池。姚鳴居雲。昔年桃李已茲榮。今日蘭蓀又發生。葑菲采時皆有道。權衡分處且無情。叨陪鴛鷺朝天客。共作門闈出谷鶩。何事感恩偏覺重。忽聞金榜扣柴荆。退之自顧微劣。始不敢以叨竊之望。策試之後。遂歸盤屋山居。不一旦進士團遭人賛榜。扣關相報。方知忝幸矣。高退之字遼聖。當年門下化龍成。今日餘波進後生。仙籍共知推麗則。禁垣同得薦嘉名。桃谿早茂誇新萼。菊圃初開耀晚英。誰料羽毛方出谷。許教齊和九臯鳴。孟珠字廷玉。孔門頻建鑄顏功。紫綬青衿感激同。一簣勤勞成太華。三年恩德重維嵩。楊隨前輩穿皆中。桂許平人折欲空。慙和周郎應見顧。感知大造意無窮。劉耕字遵益。常將公道選羣生。猶被春闘屈重名。文柄久持殊歲紀。恩門三啟動寰瀛。雲霄幸接鴛鷺盛。變化欣同草木榮。乍得陽和如細柳。參差長近亞夫營。崔軒字雲章。滿朝簪紱半門生。又見新書甲乙名。孤進自今開道路。至公依舊振寰瀛。雲飛太華清詞著。花發長安白屋榮。忝受恩光同上客。唯將報德是經營。樊驥字彥龍。滿朝朱紫半門生。新榜勞人又得名。國器舊知收片玉。朝宗轉覺集登瀛。同升翰苑三年美。繼入花源九族榮。共仰蓮峯聽雲唱。欲躋仙曲意征營。崔軒字鳴岡。一振聲華入紫微。三開秦鏡照春闌。龍門舊列金章貴。鴛谷新遷碧落飛。恩感風雷皆變化。詩裁錦繡借光輝。誰知散質多榮忝。鴛鷺清塵接布衣。蒯希逸字大隱。龍門一變荷生成。況是三傳不朽名。美譽

早聞喧北闕。頽波今見走東瀛。鶯行既接參差影。鷄樹仍同次第榮。從此青衿與朱紫。升堂侍宴更何營。  
林滋字後象。恩光忽逐曉春生。金榜前頭忝姓名。三感至公碑造化。重揚文德振寰瀛。佞性爲霖雨增相賀。半在雲霄覺更榮。何處新詩添照灼。碧蓮峯下柳間營。  
李仙古字垂後。二十二年文教主。三千上士滿皇州。獨陪宣父蓬瀛奏方接。顏生魯衛遊。多羨龍門齊變化。屢看鷄樹第名流。升堂何處最榮美。朱紫環尊幾獻酬。  
黃頓字無贊。三開文鏡繼芳聲。暗指雲霄接去程。曾壓洪波先得路。早升清禁共垂名。蓮峯對處朱輪貴。金榜傳時玉韻成。更許下才聽白雪。一枝今過鄒說榮。  
張道符字夢錫。常將公道選諸生。不是鴛鴦不得名。天上宴迴聯步武。禁中麻出滿寰瀛。簪裾盡過前賢貴。門館仍叨後學榮。看著鳳池相繼入都堂。那肯滯關營。  
邱上卿字陪之。重德由來爲國生。五朝清顯冠公卿。風波久佇濟川檝。羽翼三遷出谷鶯。絳帳青衿同日貴。春蘭秋菊異時榮。孔門弟子皆賢哲。誰料窮儒忝一名。  
石貫字摠之。文學宗師心稱平。無私三用佐貞明。恩波舊是仙舟客。德宇新添月桂名。蘭署崇資金印重。蓮峯高唱玉音清。羽毛方荷生成力。難繼鶯凰上漢聲。  
李潛字德隱。科文又主守初時。光顯門生濟會期。美擅東堂登甲乙。榮同內署待恩私。羣鶯共喜新遷木。雙鳳皆當卽入池。別有倍深知。感士曾經兩度得芳枝。  
孟宁字處中。儒雅皆傳德教行。幾敦浮俗贊文明。龍門昔上波濤遠。禁署同登渥澤榮。虛散謬當陪杞梓。後先寧異感生成。時方側席徵賢急。況說謠謠近帝京。  
唐思言字子文。聖朝文德最推賢。自古儒生少比肩。再啟龍門將二紀。兩司鶯谷已三年。蓬山皆羨齊榮貴。金榜誰知忝後先。正是感恩流涕日。但思旌旆碧峯前。  
左牢字薰膠。

浹寰瀛龍門乍出難勝幸鴛侶先行是最榮遙仰高峯看白雪多慙屬和意屏營無黨長慶曾收間世英早居臺閣冠公卿天書再受恩波遠金榜三開日月明已見差肩趨翰苑更期聯步掌台衡小儒謬躡雲霄路心仰蓮峯望太清

金厚載字化光

曹汾尙書鎮許下其子希幹及第用錢二十萬榜至鎮開賀宴日張之於側時進士胡鑄有啟賀略曰桂枝折處著萊子之采衣楊葉穿時用魯連之舊箭分之名第故也又曰一千里外觀上國之風光十萬軍前展長安之春色楊汝士尙書鎮東川其子如溫及第汝士開家宴相賀營妓咸集汝士命人與紅綾一匹詩曰郎君得意及青春蜀國將軍又不貧一曲高歌綾一匹兩頭娘子謝夫人

華州榜薛侍郎諸門生詩曰時君過聽委平衡粉署華燈到曉明開卷固難窺浩汗執心空欲慕公平機雲筆舌臨文健沈宋篇章發韻清自笑觀光渾昨日披心爭不愧羣生

盧相國鈞初及第頗窘於奉費俄有一僕願爲月傭服飾鮮絜謹幹不與常等覩鈞褊乏往往有所資時俯及關宴鈞未辨釅率撓形於色僕輒請罪鈞具以實告對曰極細事耳郎君可以處分最先後勾當何事鈞初疑其妄旣而將覘之給謂之曰爾若有伎吾當主宴第一要一大第爲備宴之所次則徐圖其僕唯而去頃刻乃迴白鈞曰已稅得宅矣請幾郎檢校翌日鈞強往看之旣而朱門甲第擬於宮禁鈞不覺欣然復謂曰宴處卽大如法此尤不易張陳對曰但請選日啟聞侍郎張陳某請專掌鈞始慮其非反覆詰問但微笑不對或意其非常人亦不固於猜疑旣宴除之日鈞止於是俄覩幕布茵毯華煥無比此外

松竹花卉皆稱是鈞之醣率畢至由是公卿間靡不誇詫詰朝其僕請假給還諸色假借什物因之一去不返逮旬日鈞異其事馳往舊遊訪之則向之花竹一無所有但見頽垣壞棟而已議者以鈞之仁感通神明故爲曲贊一春之盛而成終身之美盧肅鈞之孫貞簡有祖風光化初華州行在及第泊大寇犯闕二十年縉紳靡不褊乏肅始登第俄有李鴻者造之願傭力鴻以錐刀暇日往往反資於肅此外未嘗以所須爲意肅有舊業在南陽常令鴻徵租皆如期而至往來千里而未嘗侵費一金旣及第鴻奔走如初及一春事畢鴻卽辭去

新進士尤重櫻桃宴乾符四年永寧劉公第二子覃及第時公以故相鎮淮南敕邸吏日以銀一鋌資覃醵罰而覃所費往往數倍邸吏以聞公命取足而已會時及薦新狀元方議醣率覃潛遣人厚以金帛預購數十碩矣於是獨置是宴大會公卿時京國櫻桃初出雖貴達未適口而覃山積鋪席復和以糖酪者人享蠻畫一小盃亦不啻數升以至參御輩靡不霑足

羅玠貞元五年及第關宴曲江泛舟舟沉玠以溺死後有關宴前卒者謂之報羅

宣慈寺門子不記姓氏酌其人義俠之徒也咸通十四年韋昭範先輩登第昭範乃度支侍郎楊嚴懿親宴席間布幕器皿之類皆假於計司楊公復遣以使庫供借其年三月中宴于曲江亭供帳之盛罕有倫擬時飲興方酣俄覩一少年跨驢而至驕悖之狀旁若無人於是俯逼筵席張目引頸及肩復以巨筆振築佐酒謔浪之詞所不忍聆諸君子駭愕之際忽有於衆中批其頰者隨手而墜於是連加歐擊復奪所

執筆，筆之百餘，衆皆致怒。瓦礫亂下，殆將斃矣。當此之際，紫雲樓門軋開，有紫衣從人數輩馳告曰：莫打莫打，傳呼之聲相續。又一中貴驅殿甚盛，馳馬來救。門子乃操筆迎擊，中者無不面仆于地。敕使亦爲所箠，既而奔馬而返。左右從而俱入門，亦隨閉而已。座內甚欣媿，然不測其來。仍慮事連宮禁，禍不旋踵。乃以緝錢束素召行歐者訊之。曰：爾何人？與諸郎君誰素？而能相爲如此？對曰：某是宣慈寺門子，亦與諸郎君無素。第不平其下人無禮耳。衆皆嘉歎，悉以錢帛遺之。復相謂曰：此人必須亡去，不則當爲擒矣。後旬朔，座中賓客多有假途宣慈寺門者，門子皆能識之，靡不加敬。竟不聞有追問之者。

裴思謙狀元及第後，作紅牋名紙十數，詣平康里。因宿於里中，詰旦賦詩曰：銀缸斜背解鳴璫。小語偷聲賀玉郎。從此不知蘭麝貴，夜來新惹桂枝香。

鄭合敬先輩及第後，宿平康里。詩曰：春來無處不閒行。楚閨相看別有情。好是五更殘酒醒，時時聞喚狀頭聲。楚娘·閨娘

盧肇袁州宜春人，與同郡黃頗齊名。頗富於產，肇幼貧乏，與頗赴舉。同日遼路，郡牧於離亭餞頗而已。時樂作酒酣，肇策蹇郵亭側而過，出郭十餘里。駐程俟頗爲倡。明年，肇狀元及第而歸。刺史已下接之，大慙恚。會延肇看競渡於席上，賦詩曰：向道是龍剛不信，果然銜得錦標歸。錦標·船頭所得

薛監晚年厄於宦途，嘗策羸赴朝。值新進士榜下綴行而出，時進士團所由輩數十人見，逢行李蕭條，前導曰：迴避新郎君。逢輒然，卽遣一介語之曰：報道莫貧相。阿婆三少年時，也曾東塗西抹來。

許畫者睢陽人也。薄攻五字詩。天復四年。大駕東幸。駐蹕甘棠。畫於此際及第。梁太祖長子號大卿郎君者。常與畫屬和畫以卿爲奧主。隨駕至洛下。攜同年數人。醉於梁祖私第。因折牡丹十許朵。主吏前白云。凡此花開落。皆籍其數。申令公秀才柰何。恣意攀折。畫慢罵久之。主吏銜之。潛遣一介馳報梁祖。梁祖聞之頗睚眦。獨命械畫而獻。于時大卿竊知間道。先遣使至。畫遂亡命河北。莫知所止。

鄭光業新及第年。宴次有子女卒患心痛而死。同年皆惶駭。光業撤筵中器物。悉授其母。別徵酒器。盡歡而散。乾符四年。諸先輩月燈閣打毬之會。時同年悉集。無何爲兩軍打毬。軍將數輩。私較於是。新人排比既盛。勉強遲留。用抑其銳。劉覃謂同年曰。僕能爲羣公小挫彼驕。必令解去。如何。狀元已下應聲請之。覃因跨馬執杖。躍而揖之曰。新進士劉覃擬陪奉可乎。諸輩皆喜。覃馳驟繫拂。風驅雷逝。彼皆睭眴。俄策得毬子。向空磔之。莫知所在。數輩慙沮。僶俛而去。時閣下數千人。因之大呼笑。久而方止。

咸通十三年三月。新進士集於月燈閣爲蹙鞠之會。擊拂旣罷。痛飲於佛閣之上。四面看棚櫛比。悉皆褰去帷箔。而縱觀焉。先是飲席未合。同年相與循檻肆覽。鄒希回者。年七十餘。榜末及第。時同年將欲卽席。希回堅請更一巡歷。衆皆笑。或謔之曰。彼亦何敢望回。

大中十年。鄭顥都尉放榜。請假往東洛覲省。生徒餞於長樂驛。俄有紀於屋壁曰。三十驛驘一烘塵。來時不鎖杏園春。楊花滿地如飛雪。應有偷遊曲水人。乾符丁酉歲。關宴甲於常年。有溫定者。久困場屋。坦率自恣。尤憤時之浮薄。設奇以侮之。至其日。蒙衣肩

輿金翠之飾。夐出於衆。侍婢皆稱是。徘徊於柳陰之下。俄頃諸公自露棚移樂登鵠首。旣而謂是豪貴。其中姝麗。因遣促舟而進。莫不注視於此。或肆調謔不已。羣興方酣。定乃於簾間垂足。定膝脰偉而毳。衆忽覩之。皆掩袂亟命迴舟避之。或曰。此必溫定矣。

乾寧末。駕幸三峯。太子太師盧知猷。於西溪亭子赴進士關宴。因謂前達曰。老夫似這關宴。至今相繼赴三十箇矣。

李嶢及第。在偏侍上。俯逼起居宴。霖雨不止。遣賀油幕以張去之。嶢先人舊廬升平里。凡用錢七百緡。自所居連亘通衢。殆足一里餘。參馭輩不啻千餘人。驕馬車輿。闌咽門巷。來往無有霑濡者。而金碧照耀。頗有嘉致。嶢時爲丞相韋都尉所委。干預政事。號爲李八郎。其妻又南海韋宙女。宙常資之金帛。不可勝紀。神龍已來。杏園宴後。皆于慈恩寺塔下題名。同年中推一善書者紀之。他時有將相。則朱書之。及第後知聞。或遇未及第時題名處。則爲添前字。或詩曰。曾題名處添前字。送出城人乞舊詩。

苗台符。六歲能屬文。聰悟無比。十餘歲博覽羣籍。著皇心三十卷。年十六及第。張讀亦幼擅詞賦。年十八及第。同年進士同佐鄭薰少師宣州幕。二人嘗列題於西明寺之東廡。或竊注之曰。一雙前進士。兩箇阿孩兒。台符十七不祿。讀位至正卿。

李湯題名於昭應縣樓。韋蟾覩之。走筆留謔曰。渭水秦川拂眼明。希仁何事寡詩情。只應學得虞姬墜。書字纔能記姓名。

裴晉公赴敵淮西題名華岳之闕門大順中戶部侍郎司空圖以一絕紀之曰岳前大隊赴淮西從此中原息戰鞚石闕莫教苔蘚上分明認取晉公題

白樂天一舉及第詩曰慈恩塔下題名處十七人中最少年樂天時年二十七省試性習相近遠賦玉水記方流詩攜之謁李涼公逢吉公時爲校書郎于時將他適白遽造之逢吉行攜行看初不以爲意及覽賦頭曰噫下自人上達由君成德以慎立而性由習分逢吉大奇之遂寫二十餘本其日十七本都出論曰科第之設沿革多矣文皇帝撥亂反正特盛科名志在牢籠英彥邇來林棲谷隱櫛比鱗差美給華資非第勿處雄藩劇郡非第勿居斯乃名實相符亨達自任得以惟聖作則爲官擇人有其才者靡捐於甕牖繩樞無其才者詎繫於王孫公子莫不理推畫一時契大同垂三百年擢士衆矣然此科近代所美知其美之所美者在乎端已直躬守而勿失昧其美之所美者在乎貪名巧宦得之爲榮噫大聖設科以廣其教柰何味道由徑未旋踵而身名俱泯又何科第之庇乎矧諸尋芳逐勝結友定交競車服之鮮華騁杯盤之意氣沾激價譽比周行藏始膠漆於羣強終短長於逐末乃知得失之道坦然明白邱明所謂求名而亡欲蓋而彰苟有其實又何科第之闕歟

# 唐摭言卷四

## 節操

裴晉公質狀眇小相不入貴既屢屈名場頗亦自惑會有相者在洛中大爲縉紳所神公時造之間命相者曰郎君形神稍異於人不入相書若不至貴卽當餓死然今則殊未見貴處可別日垂訪勿以蔬糲相鄙候旬日爲郎君細看公然之凡數往矣無何阻朝客在彼因退遊香山佛寺徘徊廊廡之下忽有一素衣婦人致一緹縉於僧伽和尚欄楯之上祈祝良久復取筭擲之叩頭瞻拜而去少頃度方見其所致意彼遺忘旣不可追然料其必再至因爲收取躊躇至暮婦人竟不至度不得已攜之歸所止詰旦復攜就彼時寺門始闢俄覩向者素衣疾趨而至逡巡撫膺惋歎若有非橫度從而訊之婦人曰新婦阿父無罪被繫昨告人假得玉帶二犀帶一直千餘縉以遺津要不幸遺失於此今老父不測之禍無所逃矣度撫然復細詰其物色因而授之婦人拜泣請留其一度不顧而去尋詣相者相者審度聲色頓異大言曰此必有陰德及物此後前塗萬里非某所知也再三詰之度偶以此言之相者曰祇此便是陰功矣他日無相忘勉旃勉旃度果位極人臣

盧大郎補闕盧名上字與僕家諱同下字曰暉

升平鄭公之甥也暉少孤長於外氏愚常誨之舉進士咸通十一年初舉廣明庚子歲遇大寇犯闕竄身南服時外兄鄭續鎮南海暉向與續同庠序續仕州縣官暉自號白衣卿相

然二表俱爲愚鍾愛爾來未十稔續爲節行將暉乃窮儒復脫身虎口挈一囊而至續待之甚厚時大駕幸蜀天下沸騰續勉之出處且曰人生幾何苟富貴可圖何須一第耳暉不答復請賓佐誘激者數四復虛右席以侍暉暉因曰大朝設文學之科以待英俊如暉能否焉敢期於饕餮然聞昔舅氏所勗常以第見勉今舊館寂寥柰何違宿昔之約苟白衣歿世亦其命也若見利改途有死不可續聞之加敬自是龍鍾場屋復十許歲大順中方爲宏農公所擢卒於右袞

孫泰山陽人少師皇甫穎操守頗有古賢之風泰妻卽姨妹也先是姨老矣以二子爲託曰其長損一目汝可娶其女弟姨卒泰娶其姊或詰之泰曰其人有廢疾非泰不可適衆皆伏泰之義嘗於都市遇鐵燈臺市之而命洗刷却銀也泰亟往還之中和中將家于義興置一別墅用緡錢二百千旣半授之矣泰遊吳興郡約回日當詣所止居兩月泰迴停舟徒步復以餘資授之俾其人他徙于時覩一老嫗長慟數聲泰驚悸召詰之嫗曰老婦常逮事翁姑于此子孫不肖爲他人所有故悲耳泰憮然久之因給曰吾適得京書已別除官固不可駐此也所居且命爾子掌之言訖解維而逝不復返矣子展進士及第入梁爲省郎

論曰范宣之三立德居其首夫子之四科行在其先矧乃五常者總之於仁百慮者試之於利禍福不能迴至德貧富不能窺至仁夫炯戒之倫而窮達不侔者其惟命與苟屆諸道又何窮達之異致矣  
與恩地舊交

劉虛白與太平裴公早同硯席。及公主文。虛白猶是舉子。試雜文日簾前獻一絕句曰。二十年前此夜中。  
一般燈燭一般風。不知歲月能多少。猶著麻衣待至公。

孟棨年長於小魏公。放榜日。棨出行曲謝。泣曰。先輩吾師也。泣。棨亦泣。棨出入場籍三十餘年。  
長孫籍與張公舊交。公兄呼籍。公嘗諷其改圖籍。曰。朝聞道夕死可矣。

### 師友

李華以文學名重於天寶末。至德中。自前司封員外起爲相國李梁公峴從事檢校吏部員外。時陳少遊  
鎮淮陽。尤仰公之名。一旦城門吏報華入府。少遊大喜。簪笏待之。少頃復曰。云已訪蕭公功曹矣。卽穎士  
也。

盧江何長師。趙郡李華。范陽盧東美。少與韓衢爲友。江淮間號曰四夔。

裴佶字宏正。宰相耀卿之孫。吏部郎中綜之子。卒於工部尚書鄭餘慶請先行朋友服私謚曰貞子。曰泰  
章。

喬潭。天寶十三年及第。任陸渾尉。時元魯山客死是邑。潭減俸禮葬之。復卹其孤。李華三賢論云。潭昂之。  
孫有古人風。李華稱元德秀。張友略志如道德。行如經術。

貞元十三年。李摯以大宏詞振名。與李敏同姓。同年同登第。又同甲子及第時俱二十五歲。又同門。摯嘗薦行敏詩  
曰。因緣三紀異。契分四般同。

隴西李舟與齊相國映友善。映爲將相。舟爲布衣。而舟致書於映。以交不以貴也。時映左遷于夔。舟書曰。三十三官足下。近年已來。宰臣當國。多與故人禮絕。僕以禮處足下。則足下長者。僕心未忍。欲以故人處足下。則虛悠悠之人。以僕爲詭我。欲修書逡巡至今。忽承足下出守夔國。於蒼生之望。則爲不幸。爲足下謀之。則名遂身退。斯又爲准。僕昧時者。謹以爲賀。但鄱陽、雲安。道阻且長。音塵寂蔑。永以三歎。僕所疾沈痼。方率子弟力農爲世疎矣。足下亦焉能不疎僕耶。足下素口僕所知之。其於得喪。固怡如也。然朝臣如足下寡矣。明王豈當不察之耶。惟強飯自愛。珍重珍重。

李華祭蕭穎士文。維乾元三年二月十日。孤子趙郡李華。以清酌之奠。敬祭于亡友故楊府功曹蘭陵蕭公之靈。嗚呼。茂挺平生相知。情體如一。歲月之別。俄成古今。天乎喪予。此痛何極。華疇昔之歲。幸忝周旋。足下不殊方。永慕觸目。號裂途窮。易感況哭。故人以足下才。惟挺生名。蓋天下道孤命屈。掄阨終身。避亂全絜忠也。冒危遷祔。孝也有王佐之才。先師之訓。而歿於道路。何負於天乎。痛哉。華疇昔之歲。幸忝周旋。足下不棄愚劣。一言契合。古稱管鮑。今則蕭李。有過必規。無文不講。知名當世。實類無人。循環往復。何日忘此。存實等泣血千里。羈旅相依。聞其一哀。心骨皆斷。夫痛之至者。言不能宣。雖欲寄詞。祇益填塞。茂挺君其降靈。尙享。

韓文公瘞硯文。隴西李元賓。始從進士貢在京師。或貽之硯。四年悲歡否。泰未嘗廢用。凡與之試藝春官。寔二年登上第。行於褒谷間。役者誤墜之地。毀焉。乃匣歸埋於京師里中。昌黎韓愈其友人也。贊而識之。

土乎成質。陶乎成器。復其質。非生死類。全斯毀。不忍棄。埋而識之仁之義。硯乎硯乎瓦礫異。

杜工部交鄭廣文。嘗以詩贈虔曰。諸公袞袞登臺省。廣文先生官獨冷。甲第紛紛厭梁肉。廣文先生飯不足。先生有義出羲皇。先生所孤或屈宋。德尊一代常壠坎。名垂萬古知何用。杜陵野老人更嗤。短褐身窄鬢如絲。日糴太倉五升米。時赴鄭老同衾期。得錢則相覓。沽酒不復疑。忘形到爾汝。痛飲真我師。清夜沈沈動春酌。燈前細雨簾前落。但覺高歌有鬼神。焉知餓死墳溝壑。相如逸才親滌器子雲識字終投閣。先生早賦歸去來。石田茅屋荒蒼苔。儒術於我何有哉。孔某盜跖俱塵埃。不須聞此意慘澹。生前相遇且銜盃。又曰。廣文到官舍。繫馬堂階下。醉則騎馬歸。頻遭官長罵。垂名三十年。坐客寒無氊。賴得蘇司業。時時與酒錢。及虔卽世。甫賦八哀詩。其一章誄虔也。

崔羣字敦詩。貞元八年陸贊下及第。與韓愈爲友。羣佐宣州幕時。愈與羣書論交。略云。考之百行而無瑕。窺之闡奧而不見。畛域明白。淳粹輝光。日新者唯吾君一人。僕愚陋無所知。然曉聖人之書。無所不讀。其精龜巨細。出入晦明。雖不盡識。抑不可謂不涉其源者也。以此而推之。而廣之。誠足下出羣拔萃。無謂僕從何而得也。

劉駕與曹鄴爲友。俱攻古風詩。鄴旣擢第。而不卽出京。俟駕成名同去。果諧所志。

毛傑與盧藏用書。月日雲夢子毛傑謹致書于盧公足下。傑聞君所貴者道也。所好者才也。故才高則披襟而論翰墨。道狎則言事而致談笑。何必鷄鳴狗盜。始資僥倖之能。簞食瓢飲。不顧清虛之用。自公立名

休代博物多能。帝曰爾諧擢爲近侍。所以從容禁省。出入瑣闈。忠弼在躬。優柔薦及傑時。在草莽。運厄窮愁思折俎而無因。嗟掃門而不逮。豈知羣邪遘逆。聯聲嗷噭。紫奪我朱。遠詣惡土。賴公神色自若。心行不遼。餌芝朮以養閒。坐煙篁而收思。傑梁鴻遠旅。閔仲未歸。留戀德音。徘徊失路。瓦鄉童子。當願接於宣尼。蘇門先生。竟未言於阮籍。公於傑者如彼。僕於公者若此。百年朝夕。何事惜於交遊。四海弟兄。何必輕於行路。賈生不云乎。達人大觀。物無不可。小智自私。賤彼貴我。況公拂衣高尙。習靜閑局。世事都捐。尤精道意。豈有自私而已。無大觀者哉。儻能憐雲壑獎無知。慇張良小子。說鴻濛之偈。遺黃石之書。虛往實歸。霑露之微潤。哀多益寡。落邱山之一毫。則知足下之眷深焉。小人之慶畢矣。

盧答毛公。毛子足下。勤身訪道。不毒氛瘴。裹糧鬼門。放蕩雲海。有足多矣。一昨不遺。猥辱書禮。期我遐意。詢于道真。使人慚愧也。僕知之矣。士之生代。則有冥志深蔽。滅木穹窒。鍊九還以咽氣。味三秀以詠言。固將養蒙全理。不以能鳴天性。則其上也。義感當途。說動時主。懷全德以自達。裂山河以取貴。又其次也。至於誠信不申。忠孝胥歛。獨禦魑魅。永投豺虎。無面目以可數。椎心膺以問天。斯最下也。僕在壯年。常慕其上。先貞後黜。卒罹憂患。負家爲孽。置身于此。何顏復講道德哉。雖然。少好立言。亟聞長者之說。老而彌篤。猶憐薄暮之晷。加我數年。庶無大過。覽莊生鵠鵬之喻。則乾坤龍馬之旨可好矣。培風運海。則六九之源無差矣。驗之正氣。則洗心藏密。有由矣。開卷獨得恬然會真。不知寰宇之寥廓。不知生之與謝。斯亦曖昧所守。何必爲是。儻吾人起予指掌。而說今之隱。凡不亦樂乎。道在梯稗。無相阻。曷爲區區。過勞按劍也。頃

風眩成疾下淚復厲筆力此還答無所銓次淹遲日期庶不我責盧藏用頓首  
方干師徐凝干常刺凝曰把得新詩草裏論反語曰村裏老李頻師方干後頻及第詩僧清越贈干詩云  
弟子已得桂先生猶灌園

韓文公名播天下李翹張籍皆升朝籍北面師之故愈答崔立之書曰近有李翹張籍者從予學文翹與  
陸慘員外書亦曰韓退之之文非茲世之文也古之文也其人非茲世之人古之人也後愈自潮州量移  
宜春郡郡人黃頤師愈爲文亦振大名頤嘗覩盧肇爲碑版則唾之而去案實錄愈與人交其有倫謝皆  
能卹其孤復爲畢婚嫁如孟東野張籍之類是也李義山師令狐文公呼小趙公爲郎君於文公處稱門  
生

### 氣義

郭代公年十六入太學與薛稷趙彥昭爲友時有家信至寄錢四十萬以爲學糧忽有一衰服者叩門云  
五代未葬各在一方今欲同時舉大事乏於資財聞公家信至頗能相濟否公卽命以車一時載去略無  
留者亦不問姓氏深爲趙薛所謂元振怡然曰濟彼大事亦何誚焉其年爲糧食斷絕竟不成舉  
熊執易赴舉行次潼關秋霖月餘滯於逆旅俄聞鄰店有一士吁嗟數四執易潛伺之曰前堯山令樊澤  
舉制科至此馬斃囊空莫能自進執易造焉遽輶所乘馬倒囊濟之執易其年罷舉澤明年登科  
代公爲通泉縣尉掠賣千餘人以供過客天后異之召見大愜聖旨并口占古劍一篇以進上奇之命繕

寫當直學士。

楊虞卿及第後舉三篇爲校書郎來淮南就李鄆親情遇前進士陳商啓護窮窶公未相識問之倒囊以濟。

李北海年十七攜三百縑就納國色偶遇人啓護傾囊救之。

許棠久困名場咸通末馬戴佐大同軍幕棠往謁之一見如舊相識留連數月但詩酒而已未嘗問所欲。

一旦大會賓友命使者以棠家書授之棠驚愕莫知其來啓緘卽知戴潛遣一介卹其家矣。

贊曰孰以顯廉臨財不苟孰以定交宏道則久窮乃益堅達以胡有無得無喪天長地久君子行之小人則否。

# 唐摭言卷五

## 切磋

大居守李相讀春秋誤呼叔孫婼敕略爲婼敕畧日讀一卷有小吏侍側常有不擇之色公怪問曰爾常讀此書耶曰然胡爲聞我讀至此而數色沮耶吏再拜言曰緣某師授誤呼文字今聞相公呼婼敕略爲婼敕畧方悟耳公曰不然吾未之師也自檢釋文而讀必誤在我非在爾也因以釋文示之蓋略字以田加首久而成各日配告爲畧小吏因委曲言之公大慚媿命小吏受北面之禮號爲一字師

韓文公著毛穎傳好博塞之戲張水部以書勸之凡三書其一曰比見執事多尚駭雜無實之說使人陳之於前以爲歡此有累於令德又高論之際或不容人之短如任私尙勝者亦有所累也先王存六藝自有常矣有德者不爲猶不爲損況爲博塞之戲與人競財乎君子固不爲也今執事爲之以廢棄時日籍實不識其然文公答曰吾子譏吾與人言爲無實駭雜之說此吾所以爲戲耳比之酒色不有間乎吾子譏之似同浴而譏裸體也若高論不能下氣或似有之當更思而誨之耳博塞之譏敢不承教其他俟相見

羊紹素夏課有畫狗馬難爲功賦其實取畫狗馬難於畫鬼神之意也投表兄吳子華子華覽之謂紹素曰吾子此賦未嘉賦題無鬼神而賦中言鬼神子盍爲畫狗馬難於畫鬼神賦卽善矣紹素未及改易子

華一夕成於腹笥。有進士韋象池州九華人。始以賦卷謁子華。子華聞之甚喜。象家居數日。貢一篇於子華。其破題曰。有丹青二人。一則矜能於狗馬。一則誇妙於鬼神。子華大奇之。遂焚所著。而紹素竟不能以已下之。其年。子華爲象取府元。

陳嶠謁安陸鄭郎中誠。三年方一見。誠從容謂嶠曰。識閔廷言否。嶠曰。偶未知聞。誠曰。不妨與之還往。人文似西漢。

吳融廣明中和之際。久負屈聲。雖未擢科第。同人多贊謁之如先達。有王圖工詞賦。投卷凡旬月。融旣見之。殊不言圖之臧否。但問圖曰。更曾得盧休信否。何堅臥不起。惜哉。融所得不如也。休圖之中表長於八韻。向與子華同硯席。晚年拋廢歸鏡中別墅。

李翹與陸慘書。李觀之文章如此。官止於太子校書。年止於二十九。雖有名於時俗。其率深知其至者。果誰哉。信乎。天地鬼神之無情於善人。而不罰罪也。甚矣。爲善者將安所歸乎。翹書其人贈于兄。贈于兄。蓋思君子之知我也。予與觀平生不得相往來。及其死也。則見文。嘗謂使李觀若永年。則不遠於揚子雲矣。書已之文次。忽然若觀之文亦見於君也。故書苦雨賦。綴於前。當下筆時。復得詠其文。則觀也。雖不永年。亦不甚遠於揚子雲矣。書苦雨之辭。旣又思我友韓愈。非茲世之文。古之文也。非茲世之人。古之人也。其詞旨。其意適。則孟軻旣沒。亦不見有過於斯者。當下筆時。如他人疾書之寫誦文。不是過也。其詞乃能如此。當書其一章。曰獲麟解。其他亦可以類知也。窮愁不能無述。適有書寄弟正辭。及其終亦自覺不甚下。

尋常之所爲者亦以贈焉亦唯讀觀愈之詞冀一詳焉翫再拜

李元賓與弟書曰年不甚幼近學何書擬應明經爲復有文明經世傳不可墜也文貴天成強不高也二事並良苟事立汝擇處高

景福中江西節度使鍾傳遣僧從約進法華經一千部上待之恩渥有加宣從約入內賜齋面錫紫衣一副將行太常博士戴司顏以詩贈行略曰遠來朝鳳闕歸去戀元侯時吳子華任中諫司顏仰公之名志在屬和以爲從約之資融覽之拊掌大笑曰遮阿師更不要見便把拽出得其承奉如此矣  
皇甫湜答李生二書第一書辱書適曛黑使者立復不果一二承來意之厚傳曰言及而不言失人龐書其愚爲足下答幸察來書所謂今之工文或先於奇怪者顧其文工與否耳夫意新則異於常異於常則怪矣詞高出衆出衆則奇矣虎豹之文不得不炳於犬羊鸞鳳之音不得不鏘於烏鵲金玉之光不得不炫於瓦石非有意先之也迺自然也必崔巍然後爲岳必滔天然後爲海明堂之棟必撓雲霓驪龍之珠必鑑深泉足下以少年氣盛固當以出拔爲意學文之初且未自盡其才何遽稱力不能哉圖王不成其弊猶可以霸其僅自見也將不勝弊矣孔子譏其身不能者幸勉而思進之也來書所謂浮豔聲病之文恥不爲者雖誠可恥但慮足下方今不爾且不能自信其言也向者足下舉進士舉進士者有司高張科格每歲聚者試之其所取迺足下所不爲者也工欲善其事必先利其器足下方伐柯而舍其斧可乎哉恥之不當求也求而恥之惑也今吾子求之矣是徒涉而恥濡足也寧能自信其言哉來書所謂急急於

立法寧人者迺在位者之事。聖人得勢所施爲也。非詩賦之任也。功既成澤既流。詠歌記述光揚之作。作焉。聖人不得勢。方以文詞行於後。今吾子始學未仕。而急其事。亦太早計矣。凡來書所謂數者。似言之未稱。思之或過。其餘則皆善矣。旣承嘉惠。敢自固昧。聊復所爲。俟見方盡。湜再拜。

皇甫湜與李生第二書。湜白。生之書辭甚多。志氣甚橫。流論說文章。不可謂無意。若僕愚且困。迺生詞競。於此固非宜。雖然。惡言無從。不可不卒。勿怪。夫謂之奇。則非正矣。然亦無傷於正也。謂之奇。卽非常矣。非常者。謂不如常。迺出常也。無傷於正。而出於常。雖尙之亦可也。此統論奇之體耳。未以言文之失也。夫文者。非他。言之華者也。其用在通理而已。固不務奇。然亦無傷於奇也。使文奇而理正。是尤難也。生意便其易者乎。夫言亦可以通理矣。而以文爲貴者。非他。文則遠。無文卽不遠也。以非常之文。通至正之理。是所以不朽也。生何嫉之深耶。夫繪事後素。旣謂之文。豈苟簡而已哉。聖人之文。其難及也。作春秋。游夏之徒。不能措一詞。吾何敢擬議之哉。秦漢以來。至今文學之盛。莫如屈原、宋玉、李斯、司馬遷、相如、揚雄之徒。其文皆奇。其傳皆遠。生書文亦善矣。比之數子。似猶未勝。何必心之高乎。傳曰。其言之不出。恥躬之不逮也。生自視何如哉。書之文不奇。易之文可爲奇矣。豈礙理傷聖乎。如龍戰于野。其血元黃。見豕負塗。載鬼一車。突如其来。如焚如死。如棄如此。何等語也。生輕宋玉而稱仲尼、班馬。相如爲文學案。司馬遷傳。屈原曰。雖與日月爭光可矣。生當見之乎。若相如之徒。卽祖習不暇者也。豈生稱誤耶。將識分有所至極耶。將彼之所立卓爾。非強爲所庶幾。遂讎嫉之耶。其何傷於日月乎。生笑紫貝闕兮珠宮。此與詩之金玉其相何。

異天下人有金玉爲之質者乎。被薜荔兮帶女蘿。此與贈之以芍藥何異。文章不當如此說也。豈謂怒三四而喜四三識出之白而性入之黑乎。生云虎豹之文非奇。夫長本非長。短形之則長矣。虎豹之形於犬羊。故不得不奇也。他皆倣此。生云自然者非性。不知天下何物非自然乎。生又云物與文學不相侔。此喻也。凡喻必以非類。豈可以彈喻彈乎。是不根者也。生稱以知難而退爲謙。夫無難而退。謙也。知難而退。宜也。非謙也。豈可見黃門而稱貞哉。生以一詩一賦爲非文章。抑不知一之少便非文章耶。直詩賦不是文章耶。如詩賦非文章。三百篇可燒矣。如少非文章。湯之盤銘是何物也。孔子曰。先行其言。旣爲甲賦矣。不得稱不作聲病文也。孔子云。必也正名乎。生旣不以一第爲事。不當以進士冠姓名也。夫煥乎郁乎之文。謂制度。非止文詞也。前者捧卷軸而來。又以浮豔聲病爲說。似商量文詞。當與制度之文異日言也。近風偷薄。進士尤甚。迺至有一謙三十年之說。爭爲虛張。以相高自謾。詩未有劉長卿一句。已呼阮籍爲老兵矣。筆語未有駱賓王一字。已罵宋玉爲罪人矣。書字未識偏旁。高談稷契。讀書未知句度。下視服鄭。此時之大病所當嫉者。生美才勿似之也。傳曰。唯善人能受善言。孔子曰。君子無所爭。必也射乎。問於湜者多矣。以生之有心也。聊有復不能盡。不宣。湜再拜。

以其人不稱才試而後驚

韓文公、皇甫補闕。見李長吉時年七歲。二公不之信。因面試高軒過一篇。

蔣凝咸通中詞賦絕倫。隨計塗次漢南。謁相國徐公。公見其人么麼。不信有其才。因試峴山懷古一篇。凝

於客位賦成公大奇之。

令狐文公鎮三峯時及秋賦特置五場試第一場雜文第二場試歌篇第三場表檄先是盧宏正一人就試來者皆慄縮而退馬植以將家子來求薦文公與從事皆鄙之專令人伺其詞句既而試登山采珠賦曰文豹且異於驪龍采斯疎矣白石又殊於老蚌剖莫得之衆皆大驚遂奪宏正解元矣黎逢氣貌山野及年初場後至便於簾前設席主司異之謂其生疎必謂文詞稱是專令人伺之句句來報初聞云何人徘徊曰亦是常言既而將及數聯莫不驚歎遂擢爲狀元。

王勃著滕王閣序時年十四都督閣公不之信勃雖在座而閣公意屬子婿孟學士者爲之已宿構矣及以紙筆巡讓賓客勃不辭讓公大怒拂衣而起專令人伺其下筆第一報云南昌故郡洪都新府公曰亦是老生常談又報云星分翼軫地接衡廬公聞之沈吟不言又云落霞與孤鶩齊飛秋水共長天一色公矍然而起曰此真天才當垂不朽矣遂亟請宴所極歡而罷。

論曰書云人無常師主善爲師於戲近世浮薄率皆貴彼生知恥乎下學質疑問禮者先懷愧色探微蹟奧者翻汨沈流風教頽圯莫甚於此由是李華自曰師於茂挺李翹亦曰請益退之于時名遂功成才高位顯務乎矯俗以遏崩波盛則盛矣方之繆公以小吏一言北面而師之者可謂曠古一人而已有若考覈詞藝之臧否振舉後生之行藏非唯立賢所謂報國噫今之論者信僥倖之賊歟

# 唐摭言卷六

公薦門生薦坐主師友相薦附

崔郾侍郎旣拜命於東都試舉人三署公卿皆祖於長樂傳舍冠蓋之盛罕有加也時吳武陵任太學博士策蹇而至郾聞其來微訝之乃離席與言武陵曰侍郎以峻德偉望爲明天子選才俊武陵敢不薄施塵露向者偶見太學生十數輩揚眉抵掌讀一卷文書就而觀之乃進士杜牧阿房宮賦若其人真王佐才也侍郎官重必恐未暇披覽於是揩笏朗宣一遍郾大奇之武陵曰請侍郎與狀頭郾曰已有人曰不得已卽第五人郾未遑對武陵曰不爾卽請此賦郾應聲曰敬依所教旣卽席白諸公曰適吳太學以第五人見惠或曰爲誰曰杜牧衆中有以牧不拘細行間之者郾曰已許吳君矣牧雖屠沽不能易也

韓文公皇甫湜貞元中名價籍甚亦一代之龍門也奇章公始來自江黃間置書囊於國東門攜所業先詣二公卜進退偶屬二公從容皆謁之各袖一軸面贊其首篇說樂韓始見題而掩卷問之曰且以拍板爲什麼僧孺曰樂句二公因大稱賞之間所止僧孺曰某始出山隨計進退唯公命故未敢入國門荅曰吾子之文不止一第當垂名耳因命於客戶坊僦一室而居俟其他適二公訪之因大署其門曰韓愈皇甫湜同訪幾官先輩不遇翌日自遺闕而下觀者如堵咸投刺先謁之由是僧孺之名大振天下盧延讓光化三年登第先是延讓師薛許下爲詩詞意入癖時人多笑之吳翰林融爲侍御史出官峽中

延讓時薄遊荆渚。貧無卷軸。未遑贊謁。會融表弟滕籍者。偶得延讓百篇。融覽大奇之。曰。此無他貴。不尋常耳。於是稱之於府主成汭。時故相張公職大租於是邦。常以延讓爲笑端。及融言之。咸爲改觀。由是大獲舉糧。延讓深所感激。然猶因循。竟未相面。後值融赴急徵入內庭。孜孜於公卿間。稱譽不已。光化戊午歲。來自襄南。融一見如舊。相識。延讓嗚咽流涕。於是攘臂成之矣。

將仕郎守太子校書郎王冷然謹再拜上書相國燕公閣下。孔子曰。居是邦也。事其大夫之賢者。則僕所以有意上書於公爲日久矣。所恨公初爲相。而僕始總角。公再爲相。僕方志學。及僕預鄉舉。公左官于巴邱。及僕參常調。而公統軍于沙朔。今公復爲相。隨駕在秦。僕適効官分司在洛。竟未識賈誼之面。把相如之手。則堯舜禹湯之正道。稷薛夔龍之要務。焉得與相公論之乎。昔者公之有文章時。豈不欲文章者見之乎。公未富貴時。豈不欲富貴者用之乎。今公貴稱當朝。文稱命代。見天下未富貴有文章之士。不知公何以用之。公一登甲科。三至宰相。是因文章之得用于今。亦三十年後進之士。公勿謂無其人。何者。長安令裴耀卿。於開元五年掌天下舉擢。僕高第以才相知。今尚書右丞王邱。於開元九年掌天下選拔。僕清資。以智見許。然二君者。若無明鑒。寧處要津。是僕亦有文章思公見也。亦未富貴思公用也。此非自媒自衒。恐不道不知。有唐以來。無數才子。至於崔融、李嶠、宋之問、沈佺期、富嘉謀、徐彥伯、杜審言、陳子昂者。與公連飛並驅。更唱迭和。此數公者。真可謂五百年後挺生矣。天喪斯文。凋零向盡。唯相公日新厥德。長守富貴。甚善甚善。是知天贊明主。而福相公。當此之時。亦宜應天之休。報主之寵。彌縫其闕。匡救其災。若尸

祿備員則焉用彼相矣。僕聞位稱燮理者，則道合陰陽，四時不愆，則百姓無怨。豈有冬初不雪，春盡不雨，麥苗繼日而青死，桑葉未秋而黃落，蠢蠢迷愚，嗷嗷愁怨，而相公溫眠甲第，飽食廟堂。僕則天地之一生人，亦同人而怨相公也。京房易傳曰：欲德不用茲，謂張言人君欲賢者而不用，徒張此意，厥災荒云大旱也。陰陽不雨，復曰：師出過時，茲謂曠其旱不生。夫天道遠，人道邇，僕多言者也。安知天道，請以人事言之。主上開張翰林，引納才子，公以傲物而富貴，驕人爲相以來，竟不能進一賢，拔一善。漢高祖云：當今之賢士，豈獨異於古人乎？有而不知，是彰相公之暗；知而不用，是彰相公之短。故自十月不雨，至于五月雲纔積，而便散，雨垂落而復收。此欲德不用之罰也。仍聞六胡爲孽，日寇邊陲，邦家連兵來往塞下，巴西諸將必不出師，過時之咎也。四郊之多壘，卿大夫之辱也。不知廟堂肉食者，何以謀之？相公在外十餘年，而復相國，險阻艱難，備嘗之矣。民之情偽，盡知之矣。今人室如懸磬，野無青草，何恃而不恐？天則不雨，公將若之何？昨五月有恩，百官受賜，相公官旣大物，亦多有金銀器及錦衣等，聞公受之，面有喜色。今歲大旱，黎民阻饑，公何不固辭金銀，請賑倉廩，懷寶衣錦於相公安乎？百姓餓欲死，公何不舉賢自代，讓位請歸？公三爲相，而天下之人皆以公爲亢極矣。夫物極則反，人盛必衰。日中則昃，月成則虧。老子曰：功成名遂，身退，天之道也。今公富貴功成，文章名遂，唯身未退耳。相公昔在南中，自爲岳陽集，有送別詩云：誰念三千里江潭一老翁？則知虞卿非窮愁不能著書以自寬，賈誼非流竄不能作賦以自安。公當此時，思欲生入京華，老歸田里，脫身瘴癘，其可得乎？今則不然，忘往日之棲遲，貪暮年之富貴，僕恐前途更失，後恨難追。

主上以相公爲賢使輔佐社稷若棄德不讓是廢明君之舉豈曰能賢僕見相公事方急不可默諸桃李公聞人之言或中猶可收以桑榆詩曰投我以木瓜報之以瓊琚此言雖小可以喻大相公五君詠曰淒涼丞相府餘慶在元成蘇公一聞此詩移相公於荆府積漸至相由蘇得也今蘇屈居益部公坐廟堂投木報瓊義將安在亦可舉蘇以自代然後爲方朔之行抑又聞屋漏在上知之在下報國之重莫若進賢去年赦書云草澤卑位之間恐遺賢俊宜令兵部卽作牒目徵召奏聞而吏部起請云試日等第全下者舉主量加貶削條目一行僕知天下父不舉子兄不舉弟向者百司諸州長官皆無才能之輩並是全軀保妻子之徒一入朝廷則恐出暫居州郡卽思改豈有輕爲進舉以取貶削今聞天下向有四百人應舉相公豈與四百人盡及第乎旣有第差由此百司諸州長官懼貶削而不舉者多矣僕竊謂今之得舉者不以親則以勢不以賄則以交未必能鳴鼓四科而裹糧三道其不得舉者無媒無黨有行有才處卑位之間仄陋之下吞聲飲氣何足算哉何乃天子令有司舉之而相公令有司拒之則所謂欲德不用徒張此意事與京房易傳同故天下以大旱相試也去年所舉縣令吏部一例與官舉若得人天下何不雨賢俊之舉楚旣失之縣令之舉齊亦未得夫有賢明宰相尙不能燮理陰陽而令庸下宰君豈卽能緝熙風化相公必欲選良宰莫若舉前倉部員外郎吳太元爲洛陽令必欲舉御史中丞莫若舉襄州刺史靳口清輦轂之路非太元不可生臺閣之風非靳不可僕非吳靳親友但以知其賢明相公有而不知知而不用亦其過深矣抑又聞之昔閔子騫爲政曰仍舊貫如之何何必改作凡校書正字一政不得入畿相公

曾爲此職見貞觀已來故事今吏部侍郎楊滔眼不識字心不好賢無穢我清司改張我舊貫去年冬奏請自今已後官無內外一例不得入畿卽知正字校書不如一鄉縣尉明經進士不如三衛出身相公復此改張甄別安在古人有坐釣登相立籌封侯今僕無尙父之謀薛公之策徒以仕於書苑生於學門小道逢時大言祈相僕也幸甚幸甚去冬有詩贈公愛子協律其詩有句云官微思倚玉交淺怯投珠呂氏春秋云嘗之巒之味可知一鼎之味請公且看此十字則知僕曾吟五言則亦更有舊文願呈作者如公之用人蓋已多矣僕之思用其來久矣拾遺補闕寧有種乎僕雖不佞亦相公一株桃李也此書上論不雨陰陽乖度中願相公進賢爲務下論僕身求用之路事繁而言不典理切而語多忤其善也必爲執事所哂其惡也必爲執事所怒儻哂旣罷怒方解則僕當持舊文章而再拜來也

韓偓天復初入翰林其年冬車駕出幸鳳翔偓有扈從之功返正初上面許偓爲相奏云陛下運契中興當復用重德鎮風俗臣座主右僕射趙崇可以副陛下是選乞迴臣之命授崇天下幸甚上嘉歎翌日制用崇暨兵部侍郎王贊爲相時梁太祖在京素聞崇之輕佻贊復有嫌釁馳入請見於上前具言二公長短上曰趙崇是偓薦時偓在側梁主叱之偓奏曰臣不敢與大臣爭上曰韓偓出尋謫官入閩故偓有詩曰手風慵展八行書眼暗休看九局圖憲裏日光飛野馬桉前筠管長蒲盧謀身拙爲安蛇足報國危曾擣虎鬚滿世可能無默識未知誰擬試秦竽

崔顥薦樊衡書夫相州者九王之舊都西山雄崇足是秀異竊見縣人樊衡年三十神爽清晤才能絕倫

雖白面書生有雄膽大略深識可以軌時俗長策可以安塞裔藏用守道實用歲年今國家封山勒崇希代罕遇含育之類莫不踴躍況詔徵隱逸州貢茂異衡之際會千載一時君侯復躬自執圭陪鑾日觀此州名藩必有所舉當是舉者非衡而誰伏願不棄賢才賜以甄獎得奔大禮升聞天朝衡因此時策名樹績報國榮家今當代之士知出君侯之門矣願不勝區區敢聞左右俯伏階屏用增戰汗

顥薦齊秀才書某官至辱垂下問令公舉一人可管記之任者愚以爲軍中之書記節度使之喉舌指事立言而上達思中天心發號出令以下行期悅人意諒非容易而可專據竊見前進士高陽齊孝若考叔年二十四舉必專授文皆雅正詞賦甚精章表殊健疏眉目美風姿外若坦蕩中甚畏慎執事儻引在幕下列於賓佐使其馳一檄飛書必能應馬上之急求言腹中之所欲夫掇芳刈楚不棄幽遠況孝若相門子弟射策甲科家居君侯之宇下且數年矣不勞重幣而獲至寶甚善甚善雄都大府多士如林最所知者斯人也請爲閣下記其若此唯用與舍高明裁之謹再拜

李翹薦所知於徐州張僕射書翹載拜齊桓公不疑於其臣管夷吾信而伯天下攘戎狄匡周室亡國存荆楚服諸侯無不至焉豎刁易牙信而國亂身死不葬五公子爭立兄弟相及者數世桓公之信於其臣一道也所信者得其人則格于天地功及後世不得其人則不能免其身知人不易也豈唯霸者焉雖聖人亦不免焉帝堯之時賢不肖皆立於朝堯能知舜於是乎放驢兒流共工殛鯀竄三苗舉禹稷臯陶二十有二人加諸上位故堯崩三載四海之內遏密八音後世之人皆謂之帝堯焉向使堯不能知舜而遂

尊驩兜共工之徒於朝禹稷臯陶之下二十有二人不能用則堯將不能得無爲爾豈復得曰大哉堯之爲君也唯天爲大唯堯則之蕩蕩乎民無能名焉者哉春秋曰夏滅項孰滅之蓋齊滅之曷爲不言齊滅之爲桓公諱也春秋爲賢者諱此滅人之國何賢爾君子之惡惡也疾始善善也樂終桓公嘗有繼絕存亡之功故君子爲之諱也繼絕存亡賢者之事也管夷吾用所以能繼絕存亡國焉耳豎刁易牙用則不能也向使桓公始不用管夷吾未有豎刁易牙爭權不葬而亂齊國則幽厲之諸侯也始用賢而終身諱其惡君子之樂用賢也如此始不用賢以及其終而幸後世之掩其過也則微矣然則居上位流德澤於百姓者何所勞乎勞於擇賢得其人措諸上使天下皆化之焉而已茲天子之大臣有士千里者孰有如閣下之好賢不倦者焉蓋得其人亦多矣其所求而得而不取者則有人焉隴西李觀奇士也伏聞閣下知其賢將用之未及而觀病死昌黎韓愈得古人之遺風明於理亂根本之所由伏聞閣下復知其賢將用之未及而愈爲宣武軍節度使之所用觀愈皆豪傑之士也如此人不時出觀自古天下亦有數百年無如其人者焉聞閣下皆得而知之皆不得而用之翶實爲閣下惜焉豈惟翶一人而已後之讀前載者亦必多爲閣下惜之矣茲有平昌孟郊貞士也伏聞閣下舊知之郊爲五言詩自前漢李都尉蘇屬國及建安諸子南朝二謝郊能兼其體而有之李觀薦郊於梁肅補闕書曰郊之五言其有高處在古無上其有平處下顧二謝韓愈送郊詩曰作其三百首杳默咸池音彼二子皆知言者豈欺天下之人哉郊窮餓不得安養其親周天下無所遇作詩曰食薺腸亦苦強歌聲無歡出門卽有礙誰爲天地寬其窮也

甚矣。又有張籍、李景儉者，皆奇才也。未聞閣下知之。凡賢士奇人，皆有所負，不苟合於世。是以雖見之難得而知也。見而不能知，如勿見而已矣。知其賢而不能用，如勿知其賢而已矣。用而不能盡其才，如勿用而已矣。能盡其才，而容讒人之所間者，如勿盡其才而已矣。故見賢而能知，而能用，而能盡其材，而不容讒人之所間者，天下一人而已矣。茲有二人焉，皆來其一賢士也。其一常常之人也。待之禮貌不加隆焉。則賢者往而常常之人日來矣。況其待常常之人加厚，則善人何求而來哉？孔子曰：吾未見好德如好色者也。賢者不好色，而好德者雖好色，而不如好德者次也。色與德均好者，復其次也。雖好德，而不如好色者下也。不好德而好色者窮矣。人有告曰：某所有女，國色也。天下之人必竭其財求之，而無所愛矣。有人告曰：某所有國士也。天下之人則不能一往而見焉。是豈非不好德而好色者乎？賢者則宜有別於天下之人矣。孔子述易定禮樂，刪詩書作春秋，聖人也。奮乎萬世之上，其所化之者，非其道，則夷狄人也。而孔子之廟存焉。雖賢者亦不能日往而拜之。以其益於人者寡矣。故無益於人，雖孔聖之廟，猶不能朝夕而事焉。有待於人，而不能得善士良士，則不如無待也。嗚呼，人之降年，不可與期。郊將爲他人所得，而大有立於世，與短命而死，皆不可知也。二者卒然有一於郊之體，其爲惜之不可既矣。閣下終不得而用之矣。雖恨之，亦無可奈何矣。翹窮賤人也。直詞無讓，非所宜至于此者也。爲道之存焉耳。不直，則不足以伸道也。非好多言者也。翹再拜。

贊曰：舉孤棄讐，聖人所美。下展蔽善，匹夫所鄙。懿彼數公，時行時止。守道克勤，薦賢不倚。洽然所尚，鴻儒

不爲矣。



# 唐摭言卷七

起自寒苦不第卽貴附。

武德五年李義琛與弟義琰從弟上德三人同舉進士義琛等隴西人世居鄴城國初草創未定家素貧乏與上德同居事從姑定省如親焉隨計至潼關遇大雪逆旅不容有咸陽商人見而憐之延與同寢處居數日雪霽而去琛等議鬻驢以一醉酬之商人竊知不辭而去義琛後宰咸陽召商人與之抗禮琛位至刑部侍郎雍州長史義琰相高宗皇帝上德司門郎中

王播少孤貧嘗客揚州惠昭寺木蘭院隨僧齋食諸僧厭怠播至已飯矣後二紀播自重位出鎮是邦因訪舊遊向之題已皆碧紗幕其上播繼以二絕句曰二十年前此院遊木蘭花發院新脩而今再到經行處樹老無花僧白頭上堂已了各西東慙愧闇黎飯後鐘二十年來塵撲面如今始得碧紗籠

鄭朗相公初舉遇一僧善氣色謂公曰郎君貴極人臣然無進士及第之分若及第卽一生厄塞旣而狀元及第賀客盈門唯此僧不至及重試退黜唁者甚衆而此僧獨賀曰富貴在裏旣而竟如其所卜李絳趙郡贊皇人曾祖貞簡祖岡官終襄帥絳爲名相絳子璋宣州觀察楊相公造白檀香亭子初成會親賓落之先是璋潛遣人度其廣狹織一地毯其日獻之及收敗璋從坐璋子德璘名過其實入梁終夕拜

徐商相公常於中條山萬固寺泉入院讀書。家廟碑云：隨僧洗鉢。

韋令公昭度少貧窶，常依左街僧錄淨光大師隨僧齋粥。淨光有人倫之鑒，常器重之。

好放孤寒

元和十一年歲在丙申，李涼公下三十三人皆取寒素。時有詩曰：元和天子丙申年，三十三人同得仙。袍似爛銀文似錦，相將白日上青天。

李太尉德裕頗爲寒畯開路，及謫官南去，或有詩曰：八百孤寒齊下淚，一時南望李崖州。

昭宗皇帝頗爲寒畯開路。崔合州榜放，但是子弟無間文章厚薄，鄰之金瓦，其間屈人不少。孤寒中唯程晏、黃滔擅場之外，其餘以呈試考之，濫得亦不少矣。然如王貞白、張蠻詩、趙觀文古風之作，皆臻前輩之間闕者也。

升沈後進

太和中蘇景允、張元夫爲翰林主人。楊汝士與弟虞卿及漢公尤爲文林表式。故後進相謂曰：欲入舉場先問蘇張。蘇張猶可，三楊殺我。

大中咸通中，盛傳崔慎由相公嘗寓尺題於知聞。或曰：王凝裴瓉舍弟安潛，朝中無呼字，知聞廳裏絕脫靴賓客，凝終宣城瓉禮部尚書，潛侍中。太平王崇、竇賢二家，率以科目爲資，足以升沈後進。故科目舉人相謂曰：未見王竇，徒勞漫走。

奇章公始舉進士。致琴書於瀟灑間。先以所業謁韓文公。皇甫員外時首造退之。退之他適。第留卷而已。無何退之訪湜。遇奇章亦及門。二賢見刺。欣然同契延接。詢及所止。對曰。某方以薄技。卜妍醜於崇匠。進退惟命。一囊猶寘於國門之外。二公披卷。卷首有說樂一章。未閱其詞。遽曰。斯高文也。且以拍板爲什麼。對曰。謂之樂句。二公相顧大喜。曰。斯高文必矣。公因謀所居。二公沈默良久。曰。可於客戶坊稅一廟院。公如所教。造門致謝。二公復誨之曰。某日可遊青龍寺。薄暮而歸。二公其日聯鑣至彼。因大署其門曰。韓愈皇甫湜同謁幾官先輩不遇。翌日輦轂名士咸往觀焉。奇章之名。由是赫然矣。

知己

張燕公知房太尉。獨孤常州知梁補闕。二君子之美。出於李翹上楊中丞書云。竊以朝廷之士。文行光明。可以爲後進所依歸者。不過十人。翹亦常伏其門下。舉其五人。則無無誘勸之心。雖有卓犖奇怪之賢。固不可得而知也。其餘或雖知。欲爲薦言於人。復懼人不我信。因人之所不信。復生疑而不信。自信猶且不固。矧曰能人之固。是以再往見之。或不如其初。三往復不如其載。若張燕公之於房太尉。獨孤常州之於梁補闕者。萬不見一人焉。

李翹感知己賦序。貞元九年。翹始就州序之貢。與人事。其九月。執文章一通。謁右補闕梁君。當此時。梁君譽塞天下。屬詞求進士。奉文章走梁君門下者。蓋無虛日。梁君知人之過也。亦旣相見。遂於翹有相知之。

道焉。謂翹得古人之遺風。期翹之名不朽於無窮。許翹以拂拭吹噓。翹初謂其面相進也。亦未幸甚。十一月。梁君遘疾而歿。翹漸遊于朋友公卿間。往往皆曰。吾旣籍子姓名於補闕。梁君也。翹迺知其非面進也。當時意謂先進者遇人特達。皆合有此心。亦未謂知己之難得也。梁君歿于茲五年。翹學聖人經籍教訓文句之爲文。將數萬言。愈昔年見梁君之文。弗啻數倍。雖不敢同德於古人。然亦幸無怍於中心。每歲試於禮都。連以文章罷黜。名聲晦昧。於時俗人皆謂之固宜。然後知先進者遇人特達。亦不皆有此心。迺知知己之難得也。夫見善而不能知。雖善何爲。知而不能譽。則如弗知。譽而不能深。則如勿譽。深而不能久。則如弗深。久而不能終。則如勿久。翹雖不肖。幸辱梁君所知。君爲之言於人。豈非譽歟。謂其得古人之遺風。豈非深歟。而逮及終身。豈非久歟。不幸梁君短命遽歿。是以翹未能有成也。其誰將繼梁君之志。而成之歟。已焉哉。天之遽喪梁君也。是使予之命久遠。遭阨窮也。遂賦知己以自傷。其言怨而不亂。蓋小雅騷人之餘風也。李元賓曰。觀有倍年之友朱巨源。李華撰三賢論。劉蕡虛·蕭穎士·元德秀或曰。吾讀古人之書。而求古人之賢。未獲。遐叔謂曰。無世無賢人。其或世教不至。淪於風波。雖賢不能自辨。况察者未之究爾。鄭衛方奏。正聲間發。極和無味。至文無采。聽者不達。反以爲怪譎之音。太師樂工亦朱顏而止。曼都之姿。雜爲顛頓。縕絮蒙蕭艾。美醜夷倫。自以爲陋。此二者既病不自明。復求者亦昏。將割其善惡。在遷政化俗。則賢不肖異貫。而後賢者自明。而察者不惑也。予兄事元魯山。而友劉蕭二功曹。此三賢者可謂之達矣。或曰。願聞三子之略。遐叔曰。元之志行。當以道紀天下。劉之志行。當以中古易今世。元齊愚智。劉感一物。

不得其政。蕭呼吸折節而獲易元之道。劉之深。蕭之志。及於夫子之門。則達者其流也。然各有病。元病酒。劉病賞物。蕭病貶惡。太亟獎能太重。元奉親孝。而樂天知命。以爲王者作樂崇德。殷薦上帝。以配祖考。天人之極致也。而辭章不稱。是無樂也。於是作破陣樂詞。協商周之頌。推是而論。則見元之道矣。劉名儒史官之家。兄弟以學著。乃述詩書禮易春秋。爲古五說條貫源流。備古今之變。推是而論。則見劉之深矣。蕭以詩書爲煩。尤罪子長不編年。乃爲列傳。後代因之。非典訓也。將正其失。自春秋三家之後。非訓齊生人不錄。以序續脩。以迄于今。志就而歿。推是而論。則見蕭之志矣。元據師保之席。瞻其人。□劉備卿佐之服。居賓友之地。言理亂根源。人倫隱明。叅乎元精而後見其妙。蕭若百鍊之鋼。不可屈抑。當廢興去就之際。一死一生之間。而後見其大節。視聽過速。欲人人如我志。與時多背。常見詬於人中。取其節之舉足。可以爲人師矣。學廣而不徧精。其貫穿甚於精者。文方復雅。尚之至。嘗以律度百代爲任。古之能者。往往不至焉。超邁蹈厲。可無知者言也。茂挺父爲莒丞。得罪清河張惟。一時佐廉使按成之。茂挺初登科。自洛還莒。道邀車發辭。哀乞惟一悌下。卽日舍之。且曰。蕭贊府生一賢。方資天下風教。吾由是得罪無憾也。夫如是。得不謂之孝乎。或曰。三子者各有所與。遐叔曰。若太尉房公。可謂名卿矣。每見魯山。卽終日歎息。謂余曰。見紫芝眉宇。使人名利之心盡矣。若司業蘇公。可謂賢人矣。每謂當時名士曰。僕不幸。生於衰俗。所不耻者。識元紫芝。廣平程休士。美端重寡言。河間邢宇深明。操持不苟。字弟宙次宗。和而不流。南陽張茂之。季豐。守道而能斷。趙郡李蕡伯。高含大雅之素。萼族子丹叔。南誠莊而文。丹族子惟岳。謀道沈遠。廉靜梁國。

喬澤德源.昂昂有古風.宏農楊拯士扶敏而安道.清河房垂翼明志而好古.河東柳識方明遐曠而才是皆慕元者也.劉在京下常寢疾.房公時臨扶風聞之.通夕不寐.顧謂賓從曰.卽若不起.無復有神道.尙書劉公.清言見皇王之理矣.殷直清有識.尙恨言理少.未對劉面.常想見其人.河東裴騰士舉.朗邁真直.弟霸士會.峻清不雜.隴西李廩.敬叔堅明.沖粹范陽盧虛舟.幼真質方而清.穎川陳讜.言士然讀而不厭.渤海吳興宗秀長.專靜不渝.穎川陳謙.不器行古人之道.渤海高適達夫.落落有奇節.是皆重劉者也.工部侍郎韋述修國史.推蕭同事.禮部侍郎楊俊掌貢舉.問蕭求人.海內以爲德選.汝南邵軫緯卿.有詞學標幹.天水趙驛雲卿.才美行純.陳郡殷寅.直清達於名理.河南源衍.秀融粹而俊激.會稽孔至.惟微述而好古.河南陸據.德鄰恢恢.善於事理.河東柳芳仲敷.該博故事.長樂賈至.幼鄰名重當時.京兆韋收.仲成遠慮而深.南陽張友略.維之履道體仁.友略族弟邈.季遐溫其如玉.中山劉穎士.端疎明簡暢.穎川韓拯佐元.行略而文.樂安孫益.盈孺溫良忠厚.京兆韋建士.經中明外純.穎川陳晉.正卿深於詩書.天水尹微之誠貫百家之言.是皆後於蕭者也.茂挺與趙驛.邵軫.泊華最善.天下謂之蕭李之交.殷寅.源衍.睦於二交間.不幸元罷魯山.終于陸渾.劉避地逝于安康.蕭歸葬先人.歿于汝南.今復求斯人.有之無之.是必有之.而察之未克也.三賢不登尊位.不享下壽.居委順.賢人之達也.不蒙其教.生人之病.余知三賢也.深故言之不怍.一云李董復有權臯.張友略出韋墓銘.

杜紫微覽趙渭南卷早秋詩云殘星幾點鴈橫塞長苗一聲人倚樓吟味不已因目嘏爲趙倚樓復有贈嘏詩曰命代風騷將誰登李杜壇灞陵鯨海動翰苑鶴天寒今日訪君還有意三條冰雪借予看紫微更寄張祐略曰睫在眼前長不見道非身外更何求誰人得似張公子千首詩輕萬戶侯

貞元中李元賓韓愈李絳崔羣同年進士先是四君子定交久矣其遊梁補闕之門居三歲肅未之面而四賢造肅多矣靡不偕行肅異之一日延接觀等俱以文學爲肅所稱復獎以交遊之道然肅素有人倫之鑒觀愈等既去復止絳羣曰公等文行相契他日皆振大名然二君子位極人臣勉旃勉旃後二賢果如所卜

李華著含元殿賦蕭穎士見之曰景福之上靈光之下白樂天初舉名未振以謌詩謁顧況況謌之曰長安百物貴居大不易及讀至賦得原上草送友人詩曰野火燒不盡春風吹又生況歎之曰有句如此居天下有甚難老夫前言戲之耳

李太白始自西蜀至京名未甚振因以所業贊謁賀知章知章覽蜀道難一篇揚眉謂之曰公非人世之人可不是太白星精耶

蔣凝江東人工於八韻然其形不稱名隨計途次襄陽謁徐相商公疑其假手因試峴山懷古一篇凝於客次賦成尤得意時溫飛卿居幕下大加稱譽

論曰夫求知者匪言不通既通者匪節不合得之於內失之於外萬萬不能移也所以越石父免於羈束

未旋踵而責以非禮。善窺其合而已矣。其有屬辭敍事。言雖訐。知之者不其咎歟。苟異於是。其如險詖何。